

Proverbios

Italnamijca camanal Salomón

¹ Na niSalomón. Nitanahuatijquet ipan tali Israel huan niicone David. Huan ya ni nopa talnamijca camanali cati nijnequi nitemacas.

² Nicajoctoc ni camanali para quinmachtis masehualme quenicatzá ma motalnamictica. Quinilhuis taya ma quichihuaca para itztose cuali. ³ Nijnequi masehualme ma quiselica se talnamijca camanali cati quinamiqui para motalnamictise. Quej nopa huelis quipiyase se nemilisti cati cuali huan quichihuase cati melahuac, huan cati xitahuac, huan cati nelcuali.

⁴ Ni talnamijca camanali quinpalehuis cati huihuitique para motalnamictise. Quinpalehuis telpocame huan ichpocame para ma quipiyaca se talnamiquilisti cati cuali para amo quichihuase se huihuiyot.

⁵ Masehualme cati ya talnamiquij ma quitacaquilica cati nica eltoc huan achi más ma motalnamictica. ⁶ Nochi masehualme ma quitemoca taya quinequi quiijtos sesen ten ni talnamijca camanali, huan ni tatenpohuilisti, huan ni cuali camanali cati quiijtojtoque talnamiquini nica para huelis quimachilise nochi.

⁷ Quema se masehuali pehua quiimacasi huan quitepanita TOTECO, ya pejtoc para mochihuas talnamiqui. Pero cati huihuitique amo quinequij quicaquise camanali cati quipiya talnamiquilisti huan tamachtili.

Tamachtili para telpocame Pr. 1:8—9:18

⁸ Tinotelpoca, xijtacaquili cati motata huan monana mitzmachtíaj, huan amo xijhuejcamajcahua inincamanal. ⁹ Pampa nochi cati mitzmachtíaj, mitzhualiquilis tatepanitacayot. Elis nelcuali para ta quej se yejyectzi costi ipan moquechcuayo huan quej se corona ipan motzonteco.

¹⁰ Notelpoca, sintia hualahuij taixpanoca tacame huan quinequij mitzcajcayahuase, amo xiquincahuili. ¹¹ Huelis inijuanti mitzilhuise: “Xihuala tohuaya, ma timotatica huan tijmictise se acajya masque amo teno techchihuilijtoc. ¹² Tiquinmictise cati tetic inintacayo. Nimantzi miquise huan yase ipan ostot. ¹³ Tijpantise miyac tamanti cati ipati. Tijtemitise tochajchaj ica nochi cati tiquichtequise. ¹⁴ Xihuala huan techpalehui. Tijpiyase san setzi bolsa huan teipa san se timomajmacase nochi cati tomaco ajsis.”

¹⁵ Pero notelpoca, na nimitzilhuía amo xiya inihuaya, yon amo xijtoquili iniojhui. San xiquintalcahui. ¹⁶ Pampa inijuanti san tahuel quinequij quichihuase cati fiero, huan quinequij temictise. ¹⁷ Quema se totot quiita para masehualme quitalíaj se taquetzti ica campa yahui, nopa totot amo monechcahuía nopona. ¹⁸ Pero nopa masehualme cati huihuitique, amo. Inijuanti ica iniselti motaquechilíaj para miquise. Eltoc quej motalilíaj se lazo iniselti para mocuapilose ica cati amo cuali quichihuaj. ¹⁹ Quena, quej nopa tamimiquise nochi masehualme cati quinequij moaxcatise miyac tamanti cati sequinoc quipiyaj. Quipantise se miquilisti cati fiero pampa tahuel

itzcuime.

Se cati quipiya talnamiquilisti teconsejomaca

20 Pero itztoc se cati quipiya talnamiquilisti cati technotza. Eltoc quej moquetza ipan hueyi ojti huan ipan tianquis, huan quinojnotza nochi masehualme para ma quitacaquilica huan ma motalnamictica. **21** Quena, quinnotza nochi masehualme campa momatij mosentilíaj. Quinnotza tequichihuani cati quipiyaj inintequi para tetajtolsencahuase campa tequicali ipan altepet. **22** Huan yaya cati quipiya talnamiquilisti quinilhuía: “Amojuanti cati amo teno anquimati, ¿hasta quema quej nopa anmocahuase? Huan amojuanti cati san anquinhuhiitaj nochi masehualme cati talnamiquij, ¿hasta quema tamis anquinhuhiitase? Huan ¿hasta quema anquicualancaitase tamachilisti? **23** Xihualaca, techtacaquiliquij, huan na nimechmacas miyac talnamiquilisti. Quena, cati nimechilhuis amechtalnamiquiltis.

24 “Ya nimechnotztoc miyac huelta, pero amo anquinectoque antechtacaquilise. Talojtzitzi nimechmacac nomax huan amo antechchihuiliptoque cuenta. **25** Quena, amojuanti anquihuejcamajcajtoque nopa consejos cati quipiyaj talnamiquilisti. Amo antechtacaquiliqque quema tijnequiyayaj timechtacahaultise. **26** Pero ajsis se tonali quema anitztose ipan miyac taohuijcayot, huan cati quipiyaj talnamiquilisti san amechhuetzquilise. Quena, cati quipiyaj talnamiquilisti amechpinajtise quema

amechajsis nopa cati achi más anquimacasij.

²⁷ Quena, amechhuetzquilise quema hualas amopani miyac taohuijcasti amechnenpolos quej se chicahuac ajacat cati nochis quisosolohua. Masehualme cati quipiyaj talnamiquilisti ayecmo huelise amechpalehuise, ipan nopa hora quema hualas amopani tequipacholi, choquisti, huan taijyohuilisti.

²⁸ “Cati quipiyaj talnamiquilisti ayecmo amechnanquilise quema anquinojnotzase. Antechtemose para ma timechpalehuica, pero amo antechpantise. ²⁹ Pampa amojuanti amo anquinejque anquipiyase talnamiquilisti. Amo anquinejque anquitepanitase TOTECO huan anmotemachise ipan ya. ³⁰ San anquihuejcamajcajque inincamanal cati quipiyaj talnamiquilisti quema amechconsejomacayayaj. Amo antechchihuiliique cuenta quema timechtacahualtiyayaj. ³¹ Huajca yeca antaijyohuise pampa anquiselise amotaxtahuil por cati fiero anquichijtoque. Anquitapejpenijtoque nopa fiero ojti para anquitoquilise, campa anquipantise nochis majmajti cati nopona onca. ³² Pampa masehualme cati amo teno quimatij huan cati quihuejcamajcahuaj camanali cati quipiyaj talnamiquilisti, quipantise miquilisti. Cati huihuitique mocuapolose pampa amo quipiyaj cuidado ica tamanti cati monequi. ³³ Pero nochis masehualme cati techtacaquilise tojuanti cati tijpiyaj talnamiquilisti, itztose ica temachili huan tasehuilisti. Itztose ica paquilisti huan amo teno quiimacasise.”

2

Hueyi ipati talnamiquilisti

¹ Tinotelpoca, xijseli cati nimitzilhuía, huan xicajocui notanahuatil ipan moyolo. ² Cuali xijtacaquili nocamanal cati quipiya talnamiquilisti. Quena, ica nochí moyolo ximotali para nelcuali tijmachilis nochí. ³ Xijtemo talnamiquilisti. Quena, ica nochí moyolo ximomachti para más tijmachilis tamanti. ⁴ Xijtemo ni talnamiquilisti huan taixmatili ica nochí moyolo quej tijtemosquía miyac tomi cati motatijtoc, o quej tijtemosquía se tamanti cati nelpatiyo cati tijpolojojtoya. ⁵ Huan huajca quena, tijmachilis para tahuel monequi tijtepanitas huan tiquimacasis TOTECO, huan teipa tiquixmatis ya. ⁶ Pampa san yaya TOTECO temaca talnamiquilisti, huan ten ya huala nochí tamatilisti huan tamachilisti. ⁷ Quena, TOTECO quinmaca se cuali talnamiquilisti nochí masehualme cati itztoque xitahuaque. Quinmanahuía cati nemij cuali iixpa. ⁸ Yaya TOTECO cati quinmocuitahuía nochí cati monemiltíaj cuali. Quena, quinmocuitahuía itatzejzeloltica masehualhua ipan iniojhui.

⁹ Quema TOTECO quimaca se masehuali talnamiquilisti, yaya quimatis tetajtolsencahuas xitahuac, huan quimatis cati melahuac, huan cati nelía cuali para quichihuas. Quena, tijmatis quenicatza huelis tijtapejpenis nopa ojti cati más cuali. ¹⁰ Quema tijpiyas miyac talnamiquilisti huan tijmatis miyac tamanti cati melahuac, tijmachilis miyac paquilisti ipan moyolo. ¹¹ Huan pampa tielis titalnamiqui huan tijmatis miyac,

motalnamiquilis mitzmocuitahuis. Quena, cati tijmatis mitzchihuas para tiitztos ica temachili.

¹² Motalnamiquilis huan nopa cati tijmatis mitzmanahuise para amo tiyas ipan ojti cati amo cuali. Quena, mitzmaquixtis inimaco masehualme cati tahuel fiero camanaltij. ¹³ Motalnamiquilis mitzmaquixtis ten masehualme cati quitahuelcahuaj iojhui TOTECO, huan quitoquilíaj se ojti cati quipiya tzintayohuilot. ¹⁴ Quena, nopa amo cua-jcualme tahuel mopaquilmismacaj quema quinchihuíaj masehualme cati amo cuali. Ilhuichihuaj quema tahuel tecocojtoque huan fiero techihuili-jtoque. ¹⁵ Nopa masehualme nemij ipan se ojti cati huijcoltic, huan yon se tamanti cati quichihuaj amo eltoc cuali pampa mocuapolojtoque.

¹⁶ Nojquiya quema tijpiyas talnamiquilsti, mitzmanahuis para amo timocajcayahuas inihuaya sihuame cati amo cuali ininemilis. Nopa sihuame quinpectía momecatíaj huan quimatiq quenicatza tecajcayahuaj ica camanali cati yejyectzi. ¹⁷ Sihuame cati quej nopa quichihuaj, ya quincajejtoque inihuehuejhua cati inihuaya monamictijque quema ichpocame, huan quitahuelcajtoque itanahuatilhua TOTECO. ¹⁸ Sinta tiyas ipan nopa ojti cati yahui hasta ininchaj nopa sihuame cati quej nopa quichihuaj, tijpantis miquilsti. Elis quej tiquitzquis se ojti cati yahui micta. ¹⁹ Pampa cati mocajcayahuaj inihuaya inon sihuame, ayecmo mocualtilíaj. Ayecmo monejnemiltíaj sempa ipan ojti xitahuac campa onca se cuali nemilsti.

²⁰ Pero ta, tinotelpoca, ximonejnemilti ipan

nopa ojti campa nemij cuajcuali masehualme. Quena, xijtoquili nopa ojti cati ipan nemij cati itztoque xitahuaque. ²¹ Pampa masehualme cati itztoque xitahuaque, itztose ica temachili ipan nopa cuali tali. Quena, nopona mocahuase cati senquisa cuali. ²² Pero TOTECO quinquixtis masehualme cati amo quitepanitaj ipan nopa tali. Quena, masehualme cati temajmatíaj TOTECO quintzontamiltis.

3

Cati monequi quichihuase masehualme para quipiyase talnamiquilisti

¹ Notelpoca, amo xiquecahua cati nimitzmachtía nica. Xicajocui notanahuatil ipan moyolo. ² Pampa sintia tijchihuas cati nimitzilhuía, tiitztos para miyac xihuit huan tipiyas tasehuilisti huan paquilisti ipan moyolo. ³ Amo quema xijcahua xitetasoja huan xiquijto cati melahuac. Ma quiitaca nochí masehualme ni cuali tamanti cati tijchihua quej quiitasquíaj se costi ipan moquechta. Ma nesi tanemijya para ipan moyolo tijtoquilía tanahuatili cati xitahuac. ⁴ Huan TOTECO huan masehualme quicualitase cati tijchihua. Quena, mitztepanitase huan camanaltise cuali ten ta.

⁵ Ximotemachi ipan TOTECO ica nochí moyolo. Amo xijtoquili san cati motalnamiquilis mitzilhuía. ⁶ Ximoilhui taya ipaquilis TOTECO ipan nochí tamanti cati tijchihuasnequi, huan yaya mitzyacanas ipan se ojti cati xitahuac.

⁷ Amo ximohueyimati pampa timoilhuía nelía titalnamiqui. Más cuali xiquimacasi huan xi-jtepanita TOTECO huan ximoiyocatali ica nochicati amo cuali. ⁸ Quena, ni tamanti elis quej cualipajti cati quichicahuas campa timococohua, huan quimacas chicahualisti motacayo huan moomiyohua.

⁹ Xijmaca TOTECO cati iaxca ten nochicati tipiya para tijnextis tijtepanita TOTECO. Xijmaca TOTECO nopa achtohui pixquisti cati tijcuis ipan momila. ¹⁰ Huan TOTECO mitztiochihuas huan quitemitis mocuacalhua ica tacualisti hasta quit-zontis huan ayecmo huelis quicuis más. Yaya amechmacas xocomeca at cati yancuic hasta moca-huas para tiquis.

¹¹ Notelpoca, amo xicholo ten TOTECO quema mitztalnamictía, yon amo xicualani quema yaya mitztacahualtía. ¹² Pampa cati TOTECO quiicnelía, quitalnamictía quej se tetat quixitahua ícone cati tahuel quiicnelía.

¹³ Hueyi paquilsti quipyia se tacat cati quipantía talnamiquilsti huan mochihua talnamiqui. ¹⁴ Pampa talnamiquilsti tepalehuía miyac. Más ipati que plata huan oro cati nelía cuali. ¹⁵ Talnamiquilsti más ipati que nopa piltetzitzí cati tahuel pajpatiyo. Yon se tamanti cati tijnequisquía, amo hueli quaxilis quej ipati nopa talnamiquilsti. ¹⁶ Masehualme cati quipyaj talnamiquilsti huejcahuase itztose. Nojquiya quipantise tatiochihualisti huan tatepanitacayot. ¹⁷ Masehualme cati talnamiquij quitoquilíaj se ojti cati quipyia paquilsti. Quena, nopa ojti mitzmacas tasehuilisti ipan moyolo.

18 Talnamiquilisti eltoc quej se cuali cuahuit cati temaca se nemilisti cati nelía yejyectzi. Sinta timochihuas titalnamiqui huan amo tiquiyocacahuas motalnamiquilis, tijpiyas miyac paquilibsti ipan monemilis.

19 Ica talnamiquilisti huan tamachilisti, TOTECO quichijchijqui ilhuicacti huan taltipacti.

20 Pampa yaya nochí quimati, quichijqui para ma moxelo nopa hueyi at, huan quichijqui para ten ilhuicac ma hualtemo at para huetzis ipan taltipacti.

21 Huajca notelpoca, xijpiya cuali talnamiquilisti huan xijtacaquili ni talnamijca camanali, amo quema xiquelcahua, **22** pampa nochí ni talnamiquilisti huan tamachiltli mitzmacas se cuali nemilisti. Quena, quijejyecchihuas monemilis quej se costi quijejyecchihua se masehuali ipan iquechcuayo.

23 Sinta tijpiyas talnamiquilisti huan ya nopa tijoquilis, mitzpalehuis para tinejnemis ica temachili, huan amo timotepotanis ipan moojhui. **24** Quema timotecas para ticochis, amo timajmahuis. Timotecas huan ticochis nelía cuali. Quena, ticochis ica temachili. **25** Amo monequi tiquimacas para ipan ten hueli talojtzi hualas cati fiero mopani quej quinajsi amo cuajcualme, **26** pampa TOTECO mitzmacas temachili. Yaya amo aqui quicahuilis ma mitzmasilti ipan tajtacolot.

27 Quema quinamiqui tijpalehuis se masehuali huan tihueli tijchihuas, amo xiquilhui para amo.

28 Amo xiquilhui: “Xihuala mosta huan nimitzmacas”, sintatijpixtoc momaco para tijmacasquía ama.

²⁹ Amo ximoyolilhui cati amo cuali cati huelis tijchihuolis seyoc cati motemachía ipan ta. ³⁰ Amo xijtelhui seyoc san molhui sinta yaya amo teno mitzchihuilijtoc.

³¹ Amo xiquixtoca inemilis se masehuali cati amo quitepanita TOTECO. Amo xijtoquili yon se iojhui. ³² Pampa TOTECO quicualancaita nopa masehuali cati huijcoltic iojhui, pero quinicnelía cati itztoque xitahuaque iixpa.

³³ Quena, TOTECO quintelchihua cati itztoque ipan ininchaj masehualme cati amo quitepanitaj, pero cati itztoque ipan ininchaj masehualme cati xitahuaque iixpa quintiochihua.

³⁴ TOTECO quinpinahaultía cati tehuihuiitaj, pero hueyi iyolo TOTECO ica masehualme cati moechcapanoahuaj.

³⁵ Cati talnamiquij quiselise miyac tatepanitacayot, pero cati huīhuitique TOTECO quinpinahaultis.

4

Salomón teyolchicahua ma monejnemiltica xitahuac

¹ Amojuanti antelpocame, xijtacaquilica cati nimechmachtía quej anquitacaquilisquíaj amo-tata. Xijmachilica cati nimechilhuía para nelía anmochihuase antalnamiquini. ² Pampa nica nimechmaca se tamachtili cati cuali. Huajca amo quema xijcahuaca cati nimechilhuía. ³ Na no-jquiya nielqui se conet huan nijpixqui notata. Tahuel nechicnelyaya nonana pampa nieliyaya niiyojtzi cone.

⁴ Huan notata nechmachtí huan nechilhui: “Amo quema xiquelcahuas ni tamachtili, xijchihua cati nimitznahuatía ica nochí moyolo huan tiitztos ica cuali.” ⁵ Xijtemo talnamiquilisti huan tamachilisti cati TOTECO temaca. Amo xiquelcahua nocamanal, yon amo quema ximoiyocaquixti ten cati niquijtohua.

⁶ Amo xijcahua italnamiquilis. Xiquicneli nopa talnamiquilisti cati yaya temaca, huan mitzmocuitahuis huan mitzmanahuis ica nochí cati amo cuali. ⁷ Cati más ipati ipan monemilis elis para tijtemos talnamiquilisti huan tamachilisti ica nochí tamanti cati tijchihuas. ⁸ Xiquita quenicitza tahuel hueyi ipati talnamiquilisti. Quena, xijhueyitali talnamiquilisti huan quema tijpiyas, masehualme mitzhueyitalise huan mitztepanitase. ⁹ Huan tijselis miyac xochi coronas ipan motzoncoco. Quena, tijselis coronas cati yejyectzitzi quema masehualme mitznextilise tatepanitacayot pampa tijpiya talnamiquilisti.”

¹⁰ Notelpoca, techtacaquili huan xijchihua cati nimitzilhuiá. Sinta quej nopa tijchihuas, tiitztos miyac xihuit ipan monemilis. ¹¹ Na nimitznejnemiltijtoc ipan ojti cati xitahuac huan campa onca talnamiquilisti. ¹² Huan sinta timonejne-miltis ica talnamiquilisti, amo teno quitzacuilis moojhui. Huan sinta timotalos, amo timotepotanis. ¹³ Xijchijtinemi cati nimitzmachtía huan amo xijcahua. Mojmosta xijhuica ipan moyolo cati nimitzilhuijtoc huan tijpiyas se nemilisti nelyejyectzi.

¹⁴ Amo xicalaqui ipan iniojhui masehualme cati

amo quitepanitaj TOTECO, yon amo xijchihua cati quichihuaj. ¹⁵ Xijtalcahui campa inijuanti itztoque. Amo xipano nopona. Xicholo ten campa inijuanti yahuij huan xiya ipan seyoc ojti. ¹⁶ Pampa inijuanti amo cochij sinta amo quichijtoque cati amo cuali. Amo quinequij mosiyajquetzase sinta amo quichijtoque seyoc para ma huetzi ipan tajtacoli. ¹⁷ Quena, fiero tacame quitemohuaj se para quimictise o para quitachtequilise, quej sequinoc quitemohuaj tacualisti huan ten quiise.

¹⁸ Pero iniojhui masehualme cati itztoque xitahuaque eltoc yejyectzi quej quema tanestihuala ica ijnaloc. Huan ininemilis mochihua más yejyectzi mojmosta hasta nesis quej tonati cati taahuía ica nochí itatanex quema tajcotona. ¹⁹ Pero iniojhui masehualme cati amo quitepanitaj TOTECO eltoc quej tzintayohuilot, yon amo quimatiq ipan taya motepotaníaj.

²⁰ Pero ta tinotelpoca, xijchihuili cuenta nocamanal. Xijtacaquili nochí cati nimitzilhuía. ²¹ Amo xiquelcahua cati niquijtojtoc. Xicajocui cati nimitzilhuía ipan moyolo para nimantzi tijtoquilis. ²² Pampa cati nimitzilhuía para tijchihuas mitzmacas se nemilisti yejyectzi. Elís quej se cuali pajti cati quimacas chicahualisti nochí motacayo.

²³ Cati más ipati para tijchihuas eltoc para xijmocuitahui moyolo, pampa nopona pehua nochí monemilis.

²⁴ Amo quema xicamanalti ica camanali cati fiero, yon amo xiquijto camanali cati tacajcayahua.

²⁵ Nochipa xijtachili para tijchihuas san cati xitahuac. Quena, xijtachili taya eltoc campa tiya.

²⁶ Xijtapejpeni se cuali ojti para tijtoquilis. Quena, xijtoquili se ojti xitahuac huan nochí elis cuali para ta. ²⁷ Amo ximoiyocatali ten nopa ojti cati xitahuac, yon ica monejmat, yon ica moarraves.

5

Cati mocalaquis ica se sihuat cati amo itahuical, mociuapolos

¹ Notelpoca, xijchihuili cuenta nopa talnamiquilisti cati nijpiya. Quena, ximonacasquetza para tijmachilis nocamanal pampa nijmati taya niquipjohua. ² Huan quej nopa timochihuas titalnamiqui. Huan ticajoctiyas más tamanti cati tijmatis.

³ Icamanal se ahuilnenca sihuat eltoc tzopelic quej necti. Huan cati quijtohua nelía yejectzi, pampa tahuel quimati quenicateza tacajcayahuas.

⁴ Pero teipa cati yahui ihuaya quipantis cati chichic quej se tamanti pajyo cati temictia. Quimachilis tacuajcualoli quej quiajsisquía ipan iyolo se macheta cati oncac tatequi. ⁵ Nopa ahuilnenca sihuat quihuicas se tacat campa onca miquilisti. Quena, quiyacanas hasta quiaxititi micta. ⁶ Huijcoltic iojhui nopa sihuat, pero yon amo quimati sintia fiero campa yahui. Yaya amo quichihuilá cuenta nopa ojti xitahuac cati yahui campa onca se cuali nemilisti.

⁷ Huajca amojuanti antelpocame, xijtacaquila cati nimechilhuía, huan amo quema xiqueclahuaca nocamanal. ⁸ Xijtalcahuica se ahuilnenca sihuat, yon amo ximonechcahuica campa ichaj.

⁹ Pampa notelpoca, sintia tijpaxalos, ayecmo aqui

mitztepanitas. Huan cati tijtantoc ica miyac xihuit ten tequit, tiquinmacas masehualme cati amo quitepanitaj TOTECO huan cati amo tiquinixmati. ¹⁰ Amo xiquincahuili seyoc altepet ehuani ma moricojchihuaca ica cati timotanilijtoc. Ma amo moaxcatica cati tijpanti ica miyac taijyohuilisti huan taohuijcayot. ¹¹ Teipa san timochquilis por nochí cati fiero tijchijtoc ihuaya nopa si-huat. Huan titaijyohuis quema nopa cocolisti cati tijpanti ihuaya ica yolic mittzontamiltijtiyas. ¹² Huan huajca tiquijtos: “Más cuali nijchihuilitosquía cuenta nopa consejo cati nijcajqui. ¿Para ten amo nijtacaquili quema nechtacahualtiyayaj? ¿Para ten nijchijqui san cati nechpacti? ¹³ ¿Para ten amo nijnejqui niquntacaquilis cati nech-consejomacayayaj? ¿Para ten amo niquinchihuili cuenta quema nechmachtiyayaj cati cuali? ¹⁴ Ama por notajtacol niitztoc nechca se taixtemolis cati nechtzontamiltis. Nihuetztoc ipan se hueyi pinahualisti iniixpa nochí masehualme.”

¹⁵ Huajca notelpoca, quema tiamiqui, ximoaixhuiti ica at cati meya ipan ten ta moamel. Amo xijnechcahui se sihuat cati amo mosihua, pampa ica mosihua tijpantis paquilsti quej se at cati más ajhuiyac. ¹⁶ ¿Para ten tiquinconemacas sihuame cati san nentinemij ipan calles? ¿Para ten tijtoyahuas moxinach ipan tianquis? ¹⁷ Cati moaxca ma eli san para ta. Amo xiquinmaca sihuame cati amo tiquinixmati.

¹⁸ Ma TOTECO quitiochihua nopa chicahualisti cati mitzmacatoc pampa titacat. Huan ximopaquilismaca miyac ica nopa sihuat cati timo-

cui li quema tieliyaya titelpocat. ¹⁹ Ximoilhui ten mosihua quej se sihuatzi masat cati nelía yejyectzi nejnemi. San xiyolpaqui ica ya cati mitzicnelía miyac. Tahuel xipaqui quema yaya mitznajnahua ipan ten hueli talojtzi. Nochipa ximoixhuiti ica ya itaicnelilis. ²⁰ Huajca notelpoca, ¿para ten tinejne-
mis quej se popoyotzi ica se ahuilnenca sihuat?

Amo quinamiqui tijnajnahuas o tiquitzquis ichichihual se sihuat cati amo mosihua.

²¹ Pampa TOTECO mitztachilía huan quiita sesen tamanti cati tijchihua. Quitachilía campa tiya huan sesen pilojtzi cati ipan tinemi. ²² Masehualme cati amo quitepanitaj TOTECO momasiltise ipan inintajtacolhua. Quena, inintaixpanolhua quinitzquis huan quinilpis quej elisquía se lazo. ²³ Nopa masehualme miquise pampa amo quinejque quiselise icamanal cati quintacahualtiyaya. Pampa tahuel quinequij tajtacolchihuase, inihuihuiyo quichihuas para ma mocuapoloca para nochipa.

6

Amo xipalehui seyoc para motanehuis tomi

¹ Ta tinotelpoca, sintia tijtalijtoc mofirmá para tijpalehuis mohuampo para quitanejtise se tenijqui, o sintia titemacatoc mocamanal para tijtaxtahuis cati quitanejtía sintia ya amo hueli ya tacuepas, ya timocalaquijtoc ipan se hueyi tequipacholi. ² Ica moselti timoilpitoc ica mocamanal. Quena, ica cati tiquijto timomasiltijtoc ipan se tatzacti. ³ Huajca notelpoca, nimantzi xijchihua cati nimitzilhuía para timomanahuis. Ya tiitztoc imaco mohuampo. Huajca xiquitati

huan ximoechcapantali iixpa huan xijtajtani mo-huampo chicahuac para ma quiixpojpolo motoca campa nesi titatzquitoc ihuaya. ⁴ Amo xicochi, yon amo ximosiyajquetza. Amo xijcahua para seyoc tonali. Xijsencahua ni tamanti nimantzi. ⁵ Xijchihua nochí cati tihueli para timomanahuis quej quichihua se masat cati motalohua para mo-chololtía quema quiita se tapejquet, o se totot cati quimasiltijtoya ipan taquetzti huan teipa manahuía.

⁶ Ta cati titatzihui, xiquintachili nopa tzitzime quenicatza tequitij. Ximomachti cati quichihuaj para timotalnamictis. ⁷ Masque inijuanti amo quipiyaj se tanahuatijquet, yon se tayacanquet cati quinahuatía taya monequi quichihuase, ⁸ inijuanti tequitij chicahuac quema tatotoniya, huan quisentilíaj inintacualis para quipiyase ten quicuase quema taseseyas. ⁹ Pero ta cati titatzihui, san tijnequi ticochis. ¿Hasta quema timijquehuas? Xijmachili ya ni. ¹⁰ Sinta tiquijtos: “Noja se quentzi más niixcochis, huan san se talojtzi más nimomanajnahuas para nimosiyajquetzas”, ¹¹ ica se talojtzi ajsis mopani se hueyi mayanti quej nimantzi huala se tachtejquet quema amo tijchiya. Huan nimantzi timochihuas se cati teicneltzi pampa amo titequitic.

Cati quichihuaj amo cuajcualme

¹² Amo cuajcualme huan cati amo quitepanitaj TOTECO san istacatinemij. ¹³ Quinijcopilíaj inihuampoyohua para mocamanalhuise. Monextilíaj ica iniicxi campa yahuij. Momanextilíaj se ica seyoc cati quinequij quichihuase. ¹⁴ Temitoc

iniyolo amo cuajcualme ica tajtacoli huan mojmosta moilhuijtinemij cati fiero hueli quichihuase. Quinxelohuaj masehualme huan quinchihuaj para ma mocualanica. ¹⁵ Yeca ica se talojtzi quema nopa amo cuajcualme amo quichiyaj, inipantis cati fiero. Quinomiyopojpostequis hasta ayecmo oncas pajti. Quena, quintzontamiltis.

Tamanti cati TOTECO amo quinequi quiitas

¹⁶ Onca chicuase tamanti huan hasta chicome cati TOTECO amo quinequi quiitas. Cati más quicualancamaca eltoc ya ni:

- ¹⁷ se cati mohueyimati;
- se cati teistacahuía;
- se cati quimictía seyoc cati amo teno quichihuilijs toc;
- ¹⁸ se cati moilhuijtinemí cati fiero hueli quichihuas;
- se cati nimantzi yahui para quichihuas cati amo cuali pampa tahuel quipactía;
- ¹⁹ se cati moquetza quej se testigo huan quiistacahuía cati amo teno quichijtoc;
- se cati quipehualtía cualanti ica icnime. Nochi ya ni TOTECO amo quinequi quiitas.

Taya ipantis se tacat cati momecatía

²⁰ Notelpoca, xijtepanita cati motata huan monana mitzilhuijtoque. Amo xijcahua cati mitzmachtijtoque. ²¹ Ipan moyolo nochipa xijpixto inincamanal. Ximoilhuijtinemí cati quijtojtoque quej timoipilisquía inintamachtil ipan moquechta. ²² Pampa inintamachtil mitzyacanas campa hueli tiyas huan sintatijoquilis cati mitzilhuijtoque, ticochis cuali

huan ica temachili. Ica ijnaloc quema tiisas tijcaquis inincamanal cati mitzconsejomacas. **23** Pampa inincamanal motatahua eltos quej se taahuili cati quitaahuilis moojhui. Quema se acajya mitztacahualtía o mitztalnamictía, yaya mitznextilía se ojti campa onca se cuali nemilsti.

24 Quena, sintia tijneltucas inintamachtil motatahua, mitzmanahuis ten ahuilnenca sihuame. Cati mitzilhuijtoque mitzpalehuis para amo tiquintacaquilis nopa fiero sihuame cati tahuel quimatiq camanaltise yejyectzi. **25** Amo xiquixtoca iyejyejca se sihuat cati quej nopa, yon amo xijcahuili ma mitztani quema mitzijijcopilía ica iixteyol cati yejyectzitzi. **26** Pampa se ahuilnenca sihuat quichihua para se tacat ma quinenpolo itomi hasta ayecmo quipiyas yon para se pantzi. Quena, se momecatijca sihuat huelis quicuilis inemilis se tacat. **27** ¿Huelis se tacat moquechilis se ticiuhuit iyolixco huan amo motatis? ¡Amo! Temachti motatis. **28** Sinta se tacat nejnemis ipan ticoli, temachti icxi atotomocas. **29** Quej nopa ipantis se tacat cati momecatía ihuaya se sihuat cati quipiya ihuehue. Quiselise san se tatzacuiltli quej nochí tacame cati quiitzquíaj isihua seyoc tacat.

30 Amo aqui quicualancaita se tachtejquet cati tachtequi para amo miquis ica mayanti, **31** pero quema tequichihuani quiitzquise, monequi quiixtahuas chicome huelta imiyaca cati quichtectoc, masque monequisquía quinamacas nochí cati eltoc ipan icalijtic para taxtahuas.

32 Pero pano huihuitic se masehuali cati momecatía. Amo quipiya talnamiquilisti, pampa ica

iselti quinenpolos inemilis. ³³ Nopa tacat tahuel taijyohuis huan masehualme ayecmo quitepanitase. Huan amo quema huelis quiixpojpolos nopa pinahualisti. ³⁴ Pampa temachti ihuehue quitasomatis nopa sihuat huan tahuel cuala-nis. Amo quitapojojhuis nopa tacat quema ajsis tonali para quicuepilis cati yaya quichihuilijtoc. ³⁵ Ihuehue amo quiselis se taxtahuili para moyoltalis. Amo quitapojojhuis masque quimacasquía miyac tamanti cati ipati.

7

Xiquintahuelcahua momecatijca sihuame

¹ Notelpoca, xijneltoca noconsejos huan xicajociu nocamanal ipan moyolo. ² Sinta tijchihuas cati nimitznahtá, cuali tiitztos. Xijtacaquili nopa tanahuatili cati nimitzmachtía pampa pano ipati. ³ Amo quema xiquelcahua cati nimitzhuiá. Xijtatzquilti ipan moyolo para mocahuas mohuaya.

⁴ Xiquicneli talnamiquilisti huan tamachilisti quej tiquicnelía mosihua icni. Xiquinchihua quej elisquíaj mocualhuampoyohua. ⁵ Inijuanti mitzmanahuise para amo tijpaxaloti se momecatijca sihuat. Sinta tijpiya talnamiquilisti huan titamachilía, mitzpalehuis para amo tijtacaquilis quema se sihuat mitzcamanalhuis ica yejyectzi camanali para mitzcajcayahuas.

⁶ Se tonali na niontachixtoya ipan noventana, ⁷ huan ten miyac telpocame niquitac se telpocat cati huihuitic. ⁸ Yaya nejnemiyaya ipan nopa

calle nechca se esquina campa itztoc se ahui-
nenca sihuat, huan quiitzqui nopa ojti cati yahui
ichaj. ⁹ Ya calactoya tonati huan ya pejtoya
taixtatayohuiya. ¹⁰ Nimantzi quisqui nopa si-
huat para quinamiquiqui. Cuali mochijchij-
toya para quincajcyahuas tacame pampa tahuel
quimati quenicatza quichihuas. ¹¹ Eliyaya se si-
huat cati camanalti chicahuac huan yon quentzi
amo pinahua. Amo quema quinequi itztos ichaj.
¹² Quemantica itztoc callejtipa huan quemantica
itztoc ipan tianquis. Tachixtinemi para quinpan-
tis tacame cati huelis quincajcyahuas.

¹³ Quinechcahui nopa telpocat huan quinaj-
nhauajqui huan quitzoponi. Tahuel mosemacac.
Yon se quentzi amo pinajqui para quiilhuis:
¹⁴ “Ya nitemacac notacajcahualis para tasehuilisti
huan nijtamichijtoc nochi cati nijtajtolcajqui ni-
jchihiuasquíá, huan nijhualica nopa nacat para
se cuali tacualisti. ¹⁵ Yeca nimitztemohuayaya
pampa san ta nijnequiyaya nimitzitas, huan ama
nimitzpantijtoc. ¹⁶ Notapech nijyejyecchijtoc ica
ipantzajca cati yejyectzi. Nijcualtalijtoc notapech
ica yoyomit cati más cuali cati huala ipan tali
Egipto. ¹⁷ Huan nicajhuiyalijtoc campa timo-
tecase ica taajhuiyacayot ten mirra, áloe huan
canela. ¹⁸ Xihuala, ma timopaquilismacaca hasta
tanesis. Ma tijchihuaca ten hueli para timo-
nextilise para nelía timonequij. ¹⁹ Pampa no-
huehue amo aqui nica, yajtoc paxaloto huejca.
²⁰ Quihuicatoc miyac tomi, huan quijtojtejqui
huejcahuas nepa. Amo mocuepas hasta chic-
ahuiyas metzti.”

²¹ Quej nopa, nopa sihuat quiyolyamanili nopa telpocat ica icamanal cati yejyectzi. Quiyoltilanqui san ica iistacaticayo. ²² Huan nima nopa telpocat quitoquiliyajqui quej se huacax quema quihuicaj para quimictitij, huan quej se cati huihuitic cati amo quimati yahui ipan tatzacti campa quiselis itatzacuilitlis. ²³ Nopa telpocat eltoc quej nopa totot cati patanti xitahuac para campa eltoc taquetzti. Yon amo quimati sinta miquis hasta quimajcahuilise se cuataminti cati ajsis iyolixco.

²⁴ Huajca amojuanti cati antelpocame techta-caquilica. Xijchihuaca cati nimechilhuía. ²⁵ Amo quema xijcahuili motanequilis ma mitzcuapolo para tijtoquilis se ahuilnenca sihuat. Amo xijnechcahui nopa ojti cati yahui ichaj para amo tihuetzis ipan tajtacoli. ²⁶ Pampa sihuame cati quej nopa quichihuaj quincajgayajtoque miyac telpocame. Quena, miyac tacame quintzon-tamiltijoque. ²⁷ Sinta timonejnemiltía ipan nopa ojti para tiyas ichaj, huajca tiquitzquitoc nopa ojti cati yahui campa miquilisti.

8

Cati quipyia talnamiquilisti quipantis cati cuali

¹ ¡Xijtacaquilica! Eltoc quej se cati quipyia talnamiquilisti huan tamachilisti mitznojnotza chicahuac para xijchihuili cuenta icamanal huan timochihuas titalnamiqui. ² ¿Amo tijcactoc yaya cati quinequi mitztalnamictis? Eltoc quej moquetza ipan se tepet huejcapantic huan mitztzajtzilía. O eltoc quej moquetza campa momaxalohua ojti, ³ huan campa

icalte nopa altepet huan mitznojnotza, huan quej ni quijtohua: ⁴ “Nochi amojuanti anmasehualme, xijtacaquilica cati nimechilhuía. ⁵ Amojuanti cati amo anquimatiq quenicatza anmonejnemiltise huan anhuihuitque, ximomachtica quenicatza anquipiyase se cuali talnamiquilisti. ⁶ Xijtacaquilica cuali cati nimechilhuis pampa nocamanal nelía miyac ipati. Nochi notamachtil eltoc xitahuac. ⁷ Na niquijtohua cati melahuac. Amo quema niistacati huan amo quema nitacajcayahua. ⁸ Quena, nelía cuali nocamanal huan tepalehuía miyac. Yon se tamanti cati niquijtos elis amo cuali o necuític. ⁹ Nochi cati niquijtohua nesi nelía xitahuac para masehualme cati quimachilíaj tamanti. Quena, cati talnamiquij quimatiq nocamanal, huan quinpalehuía para quimatise más.

¹⁰ “Huajca xijselica cati nimechmachtía huan cati na nijmati, pampa achi más ipati que plata huan oro cati senquisa cuali. ¹¹ Más cuali tijpiyas talnamiquilisti huan amo nopa piltetzitzí cati más patiyo. Yon se tamanti cati tijnequi, amo eli san se ica ya.

¹² “Cati quipiya talnamiquilisti nojquiya quimati cuali para quinextilis sequinoc para quichihuase cati xitahuac ipan ininemilis. Talnamiquilisti mitzpalehuis para tijpiyas cuajcuali taixmatili huan tamachilisti. ¹³ Se cati quiimacasi huan quitepanita TOTECO, quijiyas nochí cati amo cuali. Amo quinequis quinitas masehualme cati mohueyimatij huan cati mohueyitepanitaj. Amo quinechcahuis

cati fiero ininemilis huan cati istacatij. ¹⁴ Se cati quipiya talnamiquilisti hueli temaca cuali consejos. Yaya quimati para tetajtolsencahuas xitahuac. Quimachilá miyac tamanti huan quipiya miyac chicahualisti. ¹⁵ Tanahuatiani mochihuaj talnamiquini para tanahuatise pampa quipiyaj talnamiquilisti huan quitacaquilíaj consejos. Cati quipiyaj tequiticayot hueli quichihuaj tanahuatilme cati xitahuac pampa quipiyaj talnamiquilisti. ¹⁶ Nochi tequichihuani hueli tayacanaj huan tetajtolsencahuaj xitahuac pampa quipiyaj talnamiquilisti.

¹⁷ “Masehualme cati quiicnelíaj talnamiquilisti huan quitemohuaj, quipantise huan mochihuase talnamiquini. Huan cati nelnelía quitemohuaj talnamiquilisti, quipantise. ¹⁸ Masehualme cati mochihuaj talnamiquij nojquiya quipantise ricojyot huan tatepanitacayot. Quena, quipantise se ricojyot cati huejcahuas huan mochihuase masehualme cati nelxitahuaque. ¹⁹ Masehualme cati mochihuaj talnamiquij temacase tamanti cati más cuali que oro huan plata cati pano cuali. ²⁰ Pampa talnamiquilisti quichihua para se masehuali ma monejnemilti ipan se ojti cati xitahuac huan nelcuali. ²¹ Masehualme cati quiicnelíaj talnamiquilisti, quipiyase tamanti para ininconehua. Quena, pampa talnamiquij, quitemitise ininchajchaj ica tamanti cati nelá ipati.

²² “TOTECO quipixtoya talnamiquilisti ipan ipejya nochí cati onca. Quema ayemo teno quichihuayaya. ²³ Quena, TOTECO ya ipa quipixtoya talnamiquilisti huejcajquiya quema

ayemo oncayaya taltipacti. ²⁴ Ya quipixqui talnamiquilisti quema ayemo oncayaya hueyi at ipan taltipacti, yon quema ayemo oncayaya amelme ica noch iinia. ²⁵ TOTECO ya ipa quipixtoya talnamiquilisti quema ayemo quinchihuayaya tepeme huan noch iachiquilme. ²⁶ Quena, ipa quipixtoya talnamiquilisti quema ayemo quichihuayaya taltipacti, mili huan quema ayemo oncayaya yon se quentzi ten nopa taltepociti cati ama onca.

²⁷ “TOTECO ya ipa quipixtoya talnamiquilisti quema quichijchijqui noch iati onca ipan ilhuicacti, huan quema quichijchijqui nopa huejhueyi ostot para campa ma mocahua huejhueyi at. ²⁸ Yaya ipa quipixtoya talnamiquilisti quema quitali mixti ma mocahua ipan ilhuicacti, huan quinilhui noch ihuejhueyi hueyame hasta canque tamisquíaj. ²⁹ TOTECO ya ipa quipixtoya talnamiquilisti quema quinmacac nopa huejhueyi at ininepa huan quinmacac tanahuatili para amo hueli quipanose. Yaya ya quipixtoya talnamiquilisti quema quitalili itzinpehualtil ni taltipacti. ³⁰ Huan TOTECO quitequihui italnamiquilis ipan noch itequi, huan noch iati quichijchijqui quinextia para tahuel miyac talnamiquilisti quipiya. TOTECO amo quema moiycacahua ten nopa hueyi talnamiquilisti cati quipiya. ³¹ TOTECO nelia paqui para quitequihuia italnamiquilis, huan paqui ica noch iati quichijchijchijqui. Quena, pampa quichijchijqui noch ica ihueyi talnamiquilis, ama paqui ica ni taltipacti huan noch masehualme cati quinchijchijchijqui.

³² “Huajca antelpocame, xijtacaquilica quema se cati quiyiya talnamiquilisti amechcamanalhuía. Quej nopa anquipantise miyac paquilisti huan tatiochihualisti. ³³ Xijtacaquilica cuali quema se cati talnamiqui amechmaca consejos ten quenicitza anmotalnamictise. Amo xijhuejcamajcahuaca.

³⁴ “Hueyi paquilisti quipantis nopa tacat cati quitacaquilis se cati quiyiya talnamiquilisti huan mojmosta quinequis más, masque inon tacat monequi quichiyas campa ichaj nopa tetalnamictijquet para ma quitalnamicti achi más. ³⁵ Pampa cati quipantía talnamiquilisti, quiyiwas se nemilisti cati nelía cuali, huan TOTECO quitachilis ica miyac paquilisti. ³⁶ Pero cati amo quinequi quitacaquilis nopa tetalnamictijquet para quichihuas huan quitahuelahuas, mococos ica ya iselti. Cati amo quinequij mochihuase talnamiquini quitemohuaj miquilisti.”

9

Amo san se talnamiquilisti huan huihuiyot

¹ Yaya cati nelía quiyiya talnamiquilisti quichijqui se yejyectzi cali ica chicome taquetzalme iixpa. ² Quicualtalijtoc se hueyi tacualisti, huan quichijchijtoc se taili cati más cuali. Ya quisencajtoc nopa cuamesa ica miyac tamanti tacuali. ³ Quintitanqui itequipanojcahua para ma yaca huan ma quinotzaca nochimasehualme para ma hualaca huan ma mochihuaca talnamiquini. Eltoc quej yaya cati quiyiya talnamiquilisti moquetza campa

más tahuejcapa nechca nopa altepet pampa tahuel quinequi tetalnamictis. Huan cati quipiya talnamiquilisti quiijtohua: ⁴ “Xihualaca nochaj amojuanti cati anhuihuitique huan cati amo anquimachilíaj cati cuali para anquichihuase. ⁵ Xihualaca, xijcuaqui notacualis huan xiquiquij tailisti cati cuali cati nijsencajtoc. ⁶ Xijcajtehuaca nochí huihuiyot, huan nimechnextilis quenicatza huelis anquipiyase se nemilisti cati yejyectzi. Xinejnemica ipan nopa ojti cati nimechnextilis huan ximotalnamictica.”

⁷ Sinta tijchihuas campeca para tijtalnamictis se tacat cati quinhuihuiita sequinoc o se cati fiero inemilis, yaya san mitzpinahualtis huan chicahuac mitznajnanquilis. ⁸ Huajca amo xijtacahualti se cati tehuihuiita pampa san mitzcualancaitas. Pero sintatijxitahuas se masehuali cati talnamiqui, yaya más mitzicnelis. ⁹ Xijmacthi se masehuali cati talnamiqui, huan achi más mochihuas talnamiqui. Huan sintatijmachtis se cati xitahuac monejnemiltía, achi más quimatis cati cuali para quichihuas.

¹⁰ Pampa talnamiquilisti pehua quema se acajya quiimacasi huan quitepanita TOTECO. Huan sintat se acajya quiixmatis TOTECO cati tatzejtzeloltic, quichihuas para quimachilis miyac tamanti.

¹¹ Huan talnamiquilisti mitzchihuas xiitzto miyac tonali. Quena, quimiyaqulis nopa xihuit ipan monemilis. ¹² Sintatimochihuas talnamiqui, tiquisas cuali. Pero sintatijhuihuiitas talnamiquilisti, huajca ica moselti timochihuilis cati fiero.

13 Se sihuat cati huihuitic teyolcocohua pampa amo teno cati cuali quimati. Chicahuac camanalti huan senquisa huihuitic. **14** Yaya mosehuía ipan cuasiyaj icalteno campa achi más tahuejcapa ipan nopa altepet. **15** Huan quinotza tacame cati panoj, masque inijuanti san quitoquiliijtiyahuij se ojti cati xitahuac. **16** Pero nopa sihuat amo quincahua ma panoca, quinotza huan quinilhuía: “Xihualaca nochaj.” Huan nopa telpocame cati amo teno quimachilíaj quitacaquilíaj icamanal quema quinilhuía: **17** “Xihualaca nohuaya huan nimechmacas cati nelía cuali.” Quena, cati itztoc ihuaya se sihuat quej nopa quipiya paquillisti se talojtzi quej se at cati tachtecti eltoc más tzopelic, o quej se tacualisti cati se quiichtequi huan quicua ixtacatzi ihuaya seyoc quimachilí más ajhuiyac, **18** pero cati yahuij campa ichaj nopa sihuat amo quimati jinta nopa tacame cati achtohuiya quipaxalojque, ama itztoque micta.

10

Nopa achtohui amatajcuiloli ten talnamijca camanali ten Salomón Pr. 10:1—22:16

1 Ya ni nopa talnamijca camanali cati Salomón quijcuilo. Se telpocat cati talnamiqui quipaquilismaca itata huan inana, pero se cati quej hueli nemí, quinmaca miyac tequipacholi.

2 Tamanti cati tachtecti amo temaca paquillisti, yon amo huejcahua. Pero nochí masehualme cati nemíj xitahuac iixpa TOTECO momanahuise ten se miquillisti cati fiero.

³ TOTECO amo quicahuas para se masehuali cati nemí xitahuac ma mayancamiqui, yon amo quicahuilis se masehuali cati amo quitepanita TOTECO ma ixhuis. Nochipa quinequis más.

⁴ Se cati tatzihui nimantzi mochihuas se cati teicneltzi, pero se cati tequití chicahuac, moricojchihuas.

⁵ Talnamiqui nopa tacat cati quisentilía itacualis ipan nopa tonali quema noja tatotoniya. Pero cati cochi ipan nopa hora para pixcas, pinahuas quema amo quiaxilis itacualis.

⁶ TOTECO quimacas miyac tatiochihualisti se tacat cati nemí xitahuac iixpa, pero amo cuajcualme quipantíaj miyac tamanti tatehuilisti por cati fiero quichihuaj.

⁷ Quema miqui se tacat cati xitahuac, nochí quielnamiquij ica cuali. Pero quema miquij cati amo cuajcualme, teipa ayecmo aqui quinelnamiqui pampa quinitaj quej se tamanti cati pojyajtoc.

⁸ Se cati talnamiqui quiselía tanahuatili ica paquilsti, pero se cati huihuitic camanalti miyac huan nima huetzi ica ixayac ipan tequipacholi.

⁹ Se cati monejnemiltía xitahuac quipiya temachili ipan inemilis. Pero se cati nemí ipan ojti cati huijcoltic motepotanis huan tahuel mococos.

¹⁰ Masehualme cati amo teno quichihuaj quema se tacat quiixpano seyoc, tahuel temacaj tequipacholi. Pero cati quinajhuaj chicahuac cati fiero quichihuaj quisehuíaj cualanti.

¹¹ Quema camanalti se tacat cati itztoc xitahuac eltoc quej se ameli cati temaca se nemilisti cati

cuali. Pero ipan inincamac amo cuajcualme quisa cati quipehualtía cualanti.

¹² Se cati quincualancaita sequinoc quipehualtía cualanti. Pero cati teicnelía quintapojpolhuía cati quiixpanoj.

¹³ Quema se masehuali cati talnamiqui camanalti, nochí cati quicaquij momacaj cuenta para quimachilía miyac tamanti. Pero quema se cati huihuitic camanalti, nochí momacaj cuenta para monequi se acajya quiuitequis ica se cuahuit.

¹⁴ Masehualme cati talnamiquini nochipa quinequij quimatise más tamanti. Pero se cati huihuitic camanalti quej hueli huan san motanilía tequipacholi.

¹⁵ Se cati tominpiya huelis momanahuis ica itomi para itztos ica temachili. Pero se cati teicneltzi motequipachohua pampa amo teno quipyia para ica mopalehuis.

¹⁶ Nochi cati quitani se masehuali cati itztoc xitahuac quipalehuía para quipyas cati cuali ipan inemilis. Pero amo cuajcualme san quinenpolohuaj inintomi ipan tajtacoli.

¹⁷ Se masehuali cati quitacaquilía quema seyoc quixitahua nemi ipan nopa ojtí cati yahui campa onca nemilsti. Pero se cati amo quitacaquilía cati quinequi quitalnamictis, mocuapolos.

¹⁸ Se cati tecualancaita huan mochihua quej teicnelía, yaya se istacatiquet. Huan se cati tetajilhuía nelía huihuitic.

¹⁹ Se cati tahuel camanalti amo polihui para quijitos se camanali cati ica taixpanos. Pero se

cati talnamiqui quipyia miyac cuidado ica cati quijtohua.

20 Quema se tacat cati itztoc xitahuac iixpa TOTECO camanalti, monequi tijtacaquilis pampa icamanal ipati quej plata cati más cuali. Pero inincamanal amo cuajcualme amo teno ipati.

21 Masehualme cati nemij xitahuac iixpa TOTECO hueli temacaj cuali consejos. Pero cati huihuitque miquise pampa amo quipyaj talnamiquilisti para monejnemiltise cuali.

22 Quema TOTECO quitiochihua se masehuali, yaya moricojchihua ica cati nelía ipati. Huan TOTECO quimaca miyac paquili.

23 Se tacat cati huihuitic paqui para quichihua cati fiero. Pero se cati talnamiqui paqui para quipyas más talnamiquilisti.

24 Nopa tamanti cati amo cuali cati tahuel quiimacasi se masehuali, ya nopa cati ipantis. Pero masehualme cati itztoque xitahuaque iixpa TOTECO, yaya quinmacas nopa tamanti cati quinequij.

25 Quena, quej se hueyi ajcomalacat san hualpanotiquisa, quej nopa nojquiya itztoque masehualme cati amo quitepanitaj TOTECO pampa amo huejcahuaj para itztose. Pero masehualme cati itztoque xitahuac iixpa TOTECO huejcahuase pampa moquetztoque ipan se tatzinpehualtili cati temachti.

26 Se tetequipanojquet cati tatzihui tahuel quicuesolmaca iteco quej pocti cati calaqui ipan iixteyol, o quej vinagre cati quiajsi itancoch hasta cuajcualo.

²⁷ Quema se masehuali quiimacasi huan quitepanita TOTECO, TOTECO quichihuas ma itzto miyac xihuit. Pero TOTECO quincotonilis inixihui cati amo cuajcualme.

²⁸ Cati itztoque xitahuaque iixpa TOTECO quichiyaj tamanti cati temaca paquilsti. Pero masehualme cati amo quitepanitaj TOTECO quichiyaj tamanti cati san tapic.

²⁹ TOTECO quinmocuitahuía cati nemij xitahuaque iixpa, pero quintzontamiltía masehualme cati quichihuaj cati amo cuali.

³⁰ TOTECO quintiochiwas cati itztoque xitahuaque iixpa huan amo quema tatzintahuetzise. Pero quinquixtis masehualme cati amo quitepanitaj ipan ni tali, pampa amo quincahuilis ma huejcahuaca itztose.

³¹ Quema camanalti se masehuali cati itztoc xitahuac iixpa TOTECO, tetalnamictía. Pero se tecajcayajquet, TOTECO quitzontamiltis para ayecmo huelis camanaltis.

³² Quema camanalti se cuali tacat, icamanal tepalehuía. Pero amo cuajcualme quiijtohuaj camanali cati tacajcayahua.

11

¹ TOTECO tahuel quicualancaita cati tecajcayahua huan amo ajsitoc tatamachihua. Quinequi xitatamachihua xitahuac pampa ya nopa quimaca paquilsti.

² Quema se masehuali pehua mohueyimati, sequinoc ayecmo quitepanitase. Pero cati moechcapantalíaj quipantise talnamiquilsti.

³ Masehualme cati monejnemiltíaj xitahuac quipiyaj se iniyolo cati cuali cati quinyacana huan quinilhuía taya ma quichihuaca. Pero masehualme cati quinpactía tajtacolchihuase motzontamiltise pampa tacajcayajtinemij.

⁴ Ipan nopa tonali quema TOTECO tetajtolsencahuas, itomi se tominpixquet amo quipalehuis. Pero masehualme cati itztoque xitahuaque iixpa TOTECO momanahuise ten miquilsti.

⁵ Nochi cati cuali quichihua se masehuali cati itztoc xitahuac quipalehuía para ma quipiya se ojti cati alaxtic. Pero masehualme cati amo cuajualme huetzise por inintajtacolhua.

⁶ Nopa tamanti cati cuali cati cuajualme quichihuaj quinmanahuis ten miyac taquetzti, pero cati fiero quichihuaj tajtacolchijca masehualme quinmasiltis.

⁷ Quema miqui se tacat cati amo cuali, tami nochi cati yaya quichiyayaya quichihuas. Masque yaya se tacat tetic, nenpolihuis nochi cati mochiyyayaya para quichihuas.

⁸ TOTECO quinmanahuis cati itztoque xitahuaque iixpa ten taijyohuilsti. Pero masehualme cati amo quitepanitaj, TOTECO quincahulis ma quinajsi.

⁹ Se tacat cati quipiya ome ixayac quinyolcoco-hua ihuampoyohua ica icamanal cati fiero. Pero cati itztoc xitahuac iixpa TOTECO mochololtía ten taohuijcayot por nopa cuali talnamiquilisti cati quipiya.

¹⁰ Ipan se altepet nochi masehualme paquij quema nochi quisa cuali para se cuali tacat. Pero

se altepet ilhuichihua quema miquij amo cuajcualme.

¹¹ Nopa miyac tatiochihualisti cati quiselíaj masehualme cati itztoque xitahuaque quihueytalía inialtepe. Pero amo cuajcualme quinenpolohuaj inialtepe ica cati fiero quijjtohuaj.

¹² Se cati amo cuali italnamiquilis camanalti fiero ten seyoc cati itztoc icalnechca. Pero se tacat cati talnamiqui amo molinía.

¹³ Se cati teejelnamictinemí amo quema hueli quimati se camanali cati ixtacatzí huan amo teyolmelahuas. Pero se tacat cati temachti quimati miyac tamanti cati amo tematiltía.

¹⁴ Campa amo onca tequichihuani cati talnamiquij para tayacanase, tatzintahuetzise nopa masehualme. Pero quema masehualme ipan se altepet quintequitalíaj miyac masehualme cati quinmacaj cuali consejos, itztose ica temachili.

¹⁵ Quipantis tequipacholi cati quitalis ifirma para taxtahuas por seyoc sinta yaya amo taxtahuas. Pero se cati amo quitalis ifirma para seyoc, itztos ica temachili.

¹⁶ Se sihuat cati quipyia iyolo ica sequinoc, quipantis tatepanitacayot. Pero tacame cati amo quitepanitaj TOTECO san quinequij quipantise tomi.

¹⁷ Se tacat cati tetasoja mochihuila cati cuali pampa moyolpactía, pero se tacat cati tecocohua motanahuía pampa moyolcocohua.

¹⁸ Se tacat cati amo cuali italnamiquilis tacajcayahua huan nopa tomi cati quitantoc ica tacajcayahualisti san eltoc para se talojtzi. Pero se

tacat cati quichihua cati xitahuac iixpa TOTECO quiselis se itaxtahuil cati nelía ipati.

19 Se cati quichihua cati xitahuac, yas campa onca nemilisti. Pero se cati quitoquilía cati fiero, quipantis miquilisti.

20 TOTECO quincualancaita cati moilhuíaj quenicatza hueli tacajcayahuase. Pero quincualita cati nemij nelcuali huan amo aqui hueli quintelhuía.

21 Temachti se tonali TOTECO quintatzacuiltis masehualme cati amo quitepanitaj. Pero ininconehua masehualme cati itztoque xitahuaque iixpa, TOTECO quinmanahuis ten taohuijcayot.

22 Se sihuat cati yejyectzi pero amo quipiya talnamiquilisti, eltoc huihuitic san se quej se pitzo cati quihuica ipan iyacatzol se anillo ten oro.

23 Cati cuali quinchiya masehualme cati quichihuaj cati cuali. Pero icualancayo TOTECO quinchiya amo cuajcualme.

24 Cati quinpactía temajmacase cati quipiyyaj, achi más moricojchihuase. Pero cati itzcuime huan amo quinequij temajmacase sequinoc cati iniaxca, teipa mochihuase teicneltzitz.

25 Quena, se masehuali cati hueyi iyolo huan miyac quinmaca sequinoc ten cati quipiya, moricojchihuas más. Huan cati quinpalehuía sequinoc, TOTECO quitiochihuas huan quipiyyas nochí cati monequi.

26 Se cati amo quinemaquiltía itrigo quema sequinoc quitemohuaj pampa moilhuía patiyohuas,

ialtepe ejcahua quitelchihuase. Pero cati quine-maquiltía sequinoc quema amo quipiyaj, TOTECO quitiochihuas.

27 Sinta tijtemohua cati cuali para tijchihuas, TOTECO mitzcualitas, pero sintia tijtemohua cati amo cuali para tijchihuas, ya nopa tijpantis.

28 Cati motemachía ipan itomi huetzis quej se xihuit cati huactoc. Pero masehualme cati quichihuaj cati cuali quipiyase tetili quej imacuayohua se cuahuit cati nochipa xoxohuixtoc.

29 Se huihui telpocat cati quihualica taohuij-cayot ipan ifamilia amo teno quiselis teipa cati itatahua quicahuilijtehuase. Huan yaya cati huihuitic teipa monequis quitequipanos seyoc cati talnamiquí.

30 Pero se masehuali cati itztoc xitahuac iixpa TOTECO tepalehuía quej se cuahuit cati temaca cuali nemilsti. Huan cati quinotza sequinoc ma quitoquilica TOTECO, yaya nelía talnamiquí.

31 Sinta cati itztoque xitahuaque quiselíaj inintaxtahuil nica ipan ni taltipacti por cati quichijtoque, huajca más temacti cati amo cuajcualme huan cati tajtacolchihuaj quiselise cati quinamiquí.

12

Masehualme cati xitahuaque huan injuanti cati amo quitepanitaj TOTECO

1 Se cati quipactía quiselía tamachtili cati quixitahua quipiya talnamiquilsti cati cuali. Pero se cati amo quinequi quitacaquilis cati quixitahua nelía huihuitic.

2 TOTECO quicualita se masehuali cati cuali. Pero TOTECO quitalis tatzacuiltyisti ipan nopa tacat cati moilhuía cati fiero huelis quichihuas.

3 Se masehuali amo quipantis temachili ipan inemilis por cati fiero quichihua. Pero masehualme cati quichihuaj cati cuali, quena, quipiyaj ininelhuayo cati calaqui huejcata huan amo teno quinolinis.

4 Se sihuat cati nelcuali quihualiquilía ihuehue tatepanitacayot pampa masehualme quiitaj quej se tanahuatijquet ica se corona ipan itzonteco. Pero se sihuat cati quihualiquilía ihuehue pinahualisti quicocohua ihuehue quej se cocolisti cati quicua iomiyohua.

5 Se cuali masehuali moilhuía quichihuas cati xitahuac, pero amo cuajcualme moilhuíaj quenicitza hueli tacajcayahuase.

6 Inincamanal masehualme cati amo quitepanitaj TOTECO tecocohua hasta temictía. Pero inincamanal masehualme cati itztoque xitahuaque temanahuía ten miquilisti.

7 TOTECO quintzontamiltis amo cuajcualme, pero ininteipan ixhuihua masehualme cati quichihuaj cati cuali itztose temachti para nochipa.

8 Masehualme quitepanitaj se tacat cati quipiya cuali italnamiquilis, pero se cati huihuitic quiitaj para amo teno ipati.

9 Más cuali se cati tequiti chicahuac huan mosoquihuía ipan itequi para quitanis cati yaya huan

itequipanojcahua quicuase, huan amo se masehuali cati mohueyimati huan amo quinequi motequihuis para quipiyas ten quicuas.

10 Se cuali masehuali motequipachohua por itapiyalhua pampa amo quinequi ma taijyohuica. Pero se masehuali cati amo quitepanita TOTECO amo teno moyolilhuía para quitasojtas itapiyal.

11 Se masehuali cati tequiti chicahuac ipan imila nochipa quipiyas miyac tacualisti. Pero se cati huihuitic quinenpolohua itonal pampa tatzihui.

12 Tachtequini cuelanij quema quiitaj para initequixpo quiichtectoque tamanti cati más hueyi ipati que ya. Pero cuajcualme quitanij ica inintequi para huelis quinpalehuise sequinoc.

13 Amo cuajcualme istacatij huan inincamanal quinmasiltía pampa nima nesi para amo melahuac. Pero cuajcualme amo istacatij huan momanahuíaj ten miyac tamanti taohuijcayot.

14 Se tacat cati quijtohua cati melahuac quipantis miyac tamanti cati cuali huan cati quitemitis inemilis ica paquilisti. Huan yaya cati tequiti cuali ica imax quiselis se taxtahuili cati cuali.

15 Se cati huihuitic moilhuía para nemi ipan se ojti xitahuac huan amo quinequi consejos. Pero se masehuali cati talnamiqui quintacaquilía cati quiconsejomacaj para ma monejnemilti más cuali.

16 Se cati huihuitic nimantzi cuelani quema sequinoc quitaijilhuíaj. Pero se cati talnamiqui quipiya iyolo quema quitaijilhuíaj, huan amo quinextía cuelanti.

17 Se testigo cati quijtohua nochi cati senquisa melahuac, quichihua cati xitahuac. Pero se testigo cati istacati quichihua pampa quinequi tacajcayahuas.

18 Itztoque sequij tacame cati tecocohuaj ica inincamanal quej elisquía se macheta cati tatequi. Pero inincamanal talnamiquini eltoc quej se pajti cati teyolchicahua huan teyoltalía.

19 Icamanal se testigo cati quijtohua nochi cati senquisa melahuac huejcahuas pampa nochi quiitase para xitahuac. Pero icamanal se testigo cati istacati amo huejcahuas pampa nima monextis para amo melahuac.

20 Nochi cati moilhuíaj quichihuase cati amo cuali, quisencahuaj ipan iniyolo quenicatza huelis tacajcayahuase. Pero cati itztoque xitahuaque quipiyaj paquilisti ipan iniyolo pampa moyolilhuíaj cati cuali huelis quichihuase.

21 Amo quipantise tatzacuiltili cati monejne-miltíaj xitahuac, pero miyac taohuijcayot quipantise ipan ininemilis amo cuajcualme.

22 TOTECO quincualancaita masehualme cati istacatij. Pero nochi cati quijtohuaj cati melahuac, TOTECO quincualita.

23 Se cati talnamiqui amo mohueyimati, yon amo quinextilía sequinoc nochi cati quimati. Pero cati huihuitique tahuel mohueyimati huan quijtohuaj miyac tamanti huihuiyot.

24 Xitequiti chicahuac huan tielis se tayacanquet, pero sintia timochihuas titatzihui tielis itequipanojca seyoc masehuali.

25 Se masehuali cati moyoltequipachohua nelía taijyohuía, pero se cuali camanali quimacas paquilsti ipan iyolo.

26 Se masehuali cati monejnemiltía xitahuac quinyacana ihuampoyohua ipan se cuali ojti, pero amo cuajcualme quinhuicaj sequinoc ipan se ojti campa mocuapolose.

27 Se masehuali cati tatzihui amo quinequi quitemos yon cuahuit para quiicxitis cati quipejtoc, san xoxohuic quicuas, pero se cati quipactía tequitis quitanis cati nel cuali.

28 Masehualme cati quichihuaj cati cuali quitoquilíaj nopa ojti cati tehuica campa onca nemilisti. Iniojhui amo yahui campa onca miquilsti.

13

1 Se telpocat cati talnamiqui quiselía cati itata quijtohua quema quitalnamictía, pero se cati tahuihuiita amo quitacaquilía cati quitacahualtía.

2 Se masehuali cati camanalti cuajcuali tamanti quipantis cati cuali ipan inemilis, pero masehualme cati amo quitepanitaj TOTECO san quipantise tatehuilisti.

3 Se cati quipyia miyac cuidado ica cati quijtohua huan amo quej hueli camanalti, quimocuitahuía inemilis. Pero se cati quej hueli ontananquilijtiquisa quipantía taohuijcayot.

4 Se tacat cati tatzihui quinequi miyac tamanti, pero amo quinpantía por itatzcayo. Pero se cati tequiti chicahuac, moricojchihuas.

5 Se masehuali cati itztoc xitahuac iixpa TOTECO amo quinequi quiitas istacatili, pero nopa masehualme cati amo quitepanitaj TOTECO teijistacahuijtinemij, huan huetzij ipan pinahualisti.

6 Nopa cuali tamanti cati quichihuaj cuajcualme quinmanahuía mojmosta ipan ininemilis. Pero cati fiero quichihuaj tajtacolchijca masehualme quintzontamiltía.

7 Itztoque sequij masehualme cati pilteicneltzitzi, pero mohueyimatij huan monextiáj quej tom-inpiyani. Huan itztoque sequinoc cati nelía tom-inpiyani, pero moechcapantáliaj huan mochihuaj quej teicneltzitzi.

8 Quema quiichtequiv se masehuali cati tom-inpiya huan quihiuicaj huejca, quitajtaníaj ma taxtahua miyac tomi para quimanahuis inemilis. Pero se cati teicneltzi amo monequi quiimacasis ajquiya quiitzquis huan tajtanis tomi.

9 Inemilis se cuali masehuali eltoc quej se taahuili cati tatanextiá campa hueli. Pero ininemilis tajtacolchihuani eltoc quej se taahuili cati talojtzitzi sehui.

10 Se masehuali cati motepanita quipantis tananquilisti. Pero cati moechcapano hua huan quitacaquilía consejos, quipiyas talnamiquilisti.

11 Cati moilhuía quitanis miyac tomi ipan se talojtzzi mocajcayajtoc. Pero cati quisentilía tomi sesentzitzi huan ica miyac tequit, quipiyas tomi cati momiyaquilis.

12 Quema se masehuali mojmosta quichiya para quiselis se tenijqui huan amo ajsi imaco, nelía

quiylcocohua. Pero quema se quinequi se tamanti huan teipa quiselía, nelía yolpaqui.

13 Se masehuali cati amo quinequi quiitas itanahuatilhua TOTECO, mocuapolos pampa amo quintoquilía. Pero cati quintepanitas tanahuatilme, TOTECO quitiochihuas.

14 Itamachtil se cati talnamiqui eltoc quej se ameli campa temaca se cuali nemilisti. Huan cati quitacaquilíaj icamanal se cati talnamiqui momanahuíaj ten nopa taquetzti cati quimictisquía.

15 Se masehuali cati talnamiqui quimachilía miyac tamanti huan sequinoc quicualitaj. Pero iniojhui tacajcayahuani tahuel ohui pampa quiselise tatzacuiltyli por inintajtacolhua.

16 Nochi tacame cati talnamiquij moyolilhuíaj achtohui sintia cuali para quichihuase se tamanti o amo. Pero cati huihuitique amo moyolilhuíaj achtohui. Nimantzi quichihuaj ten hueli tamanti huan quinextíaj inihuihuiyo.

17 Se tayolmelajquet cati amo quitepanita TOTECO quichihua ma onca cualanti. Pero se tayolmelajquet cati temachti teyolchicahua.

18 Quema se masehuali amo quinequi quitacaquilis cati quiconsejomaca, mochihuas teicneltzi huan teipa tahuel pinahuas. Pero se cati quitacaquilía cati quinequi quixitahuas teipa quiselis tatepanitacayot.

19 Se paquilisti quema mochihua se cuali tamanti quej se quinequiyaya ma mochihua. Pero cati huihuitique amo quinequij quicahuase ten fiero quichihuaj para quipantise cati cuali.

20 Se masehuali cati nemí inihuaya cati talnamiquij mochihuas talnamiqui. Pero cati nemí inihuaya cati huihuitique, quipantis ajquiya quipojpostequis iomiyohua.

21 Tamanti cati amo cuali quintoquilijtinemi tajtacolchihuani. Pero cati quichihuaj cati cuali quipantise miyac tatiochihualisti.

22 Quema miqui se cuali masehuali, quicajtehua miyac tamanti cati cuali para iconehua huan hasta para iixhuihua. Pero quema miqui se cati tajtacolchijtinemi, iricojyo panos ica se cati quichihuaj cati cuali.

23 Se masehuali cati teicneltzi huelis quipiyas imil cati tahuel taeliltía huan quimaca miyac tacualisti. Pero sintá amo onca tanahuatilmé cati xitahuac ipan ialtepe, fiero masehualme huelis quicchtequilise nochí.

24 Se masehuali cati amo quitacahualtía iconé quema quichihuaj tamanti cati amo cuali, quinextía para amo quiicnelía. Pero cati nelía quiicnelía iconé, pehua quixitahua quema noja pisiltzi.

25 Se masehuali cati quichihuaj cati cuali quipiya miyac tacualisti para huelis tacuas hasta ixhuis. Pero amo cuajcualme mayancamictinemij pampa amo tequitij.

14

1 Se sihuat cati talnamiqui mojmosta quisencahua ichaj para ma eli más cuali, pero se cati huihuitic quisosolohua ichaj ica cati quichihuaj.

² Cati monejnemiltía ipan nopa ojti cati xitahuac quiimacasi huan quitepanita TOTECO. Pero se cati necuiltic nemí amo quinequi quiitas.

³ Icamanal se huihui masehuali quihualiquilía tatzacuiltyi. Pero inincamanal talnamiquini quinmocuitahuía ten cati amo cuali.

⁴ Quema amo onca torojme para taxahuase, amo oncas trigo ipan cuacali para pantzi. Pero quema onca torojme cati tequitij ica nochí ininchicahualis, momiyaquilis pixquisti.

⁵ Se testigo cati temacthi amo quema istacati, pero se testigo cati quipactía tacajcayahua, mojmosta istacati.

⁶ Se cati tehuihuiita amo quema quipantis talnamiquilisti masque quijjtohua quitemohua. Pero se cati quimachilía miyac tamanti, yaya amo ohui quipantía talnamiquilisti.

⁷ Ximohuejcatali ica ten quichihua se masehuali cati huihuitic, pampa yaya amo mitznextilis yon se tamanti cati cuali.

⁸ Se cati talnamiqui yayamoilhuía cati imelach huala ipan iojhui. Pero se cati huihuitic mocajcayahua ica iselti ica ihuihuiyo.

⁹ Cati huihuitique san huetzcaj quema tajtacolchihuaj. Pero masehualme cati xitahuac nemijmoilhuíaj ipan iniyolo para monejnemiltise noja más xitahuac.

¹⁰ Sese masehuali quimati nopa tequipacholi o nopa paquilsti cati quipiya ipan iyolo. Huan amo aqui huelis quimachilis senquisa cati seyoc quimati.

¹¹ Nopa yejyectzi cali cati amo cuajcualme quipiyaj sosolihuis. Pero masque masehualme

cati xitahuaque san quipiyaj ininchaj cati teicneltzi nochí elis cuali para cati nopona itztoque.

¹² Onca ojti cati masehualme moilhuíaj para xitahuac, pero amo cana; pampa cati yahuij ipan nopa ojti quipantíaj miquilisti.

¹³ Masque se masehuali huetzca, hueli onca tamanti cati quitequipachohua miyac. Huan quema tami huetzca, noja quimachilía nopa tequipacholi.

¹⁴ Amo cuajcualme mocahuaj cuesijtoque ica nochí cati fiero quichihuaj. Pero nochí cati quichihua se cuali masehuali quitemitía iyolo ica paquilisti.

¹⁵ Se cati huihuitic nimantzi quineltoca nochí cati ihuampoyohua quiilhuíaj ma quichihua, pero se masehuali cati talnamiqui achtohui moilhuía sintá cuali para quichihuas se tamanti o amo.

¹⁶ Se cati talnamiqui quiimacasi cati amo cuali huan mohuejcatalía. Pero se cati huihuitic mochihua quej amo teno quiimacasi huan momajcahua san quej hueli campa tamanti mahuilili.

¹⁷ Se tacat cati yolquentzi nimantzi cualani huan quichihua tamanti cati amo quinamiqui. Huan nochí masehualme quicualancaitaj se cati moyolilhuía quenicatza huelis tecocos o tacajcayahuas.

¹⁸ Cati huihuitique san quipiyaj huihuiyot ipan inintzonteco, pero cati talnamiquij inijuanti quipiyaj talnamiquilisti quej se yejyectzi corona cati quihuicaj ipan inintzonteco.

¹⁹ Fiero masehualme mohujtzomase iniixpa cuajcualme. Quena, motancuaquetzase iniixpa

cati quichihuaj cati xitahuac huan quintajtanise tapalehuili.

20 Ica masehualme cati teicneltzitzti hasta intteixmatcahua amo quinequij quinitase. Pero tominpiyani quipiyaj miyac inihuampoyohua.

21 Tajtacolchihua cati amo quinequi quiitas se cati icalnechca. Pero hueyi ipaquilis se tacat cati quintasojta cati teicneltzitzti huan quinpalehuía.

22 Cati moyolilhuíaj para quichihuase san cati amo cuali, mocuapolose; pero cati moyolilhuíaj para quichihuase san cati cuali quipantise teicnelijcayot huan cati melahuac.

23 Cati tequitij cuali quiselise inintaxtahuil. Pero cati san camanaltij huan amo quichihuaj inintequi mocahuase teicneltzitzti.

24 Nopa ricojyot cati masehualme cati talnamiquij quitanij quinhualiquilía miyac tatepanitacayot. Pero cati huihuitique san quitanij más huihuiyot.

25 Se testigo cati quijtohua cati melahuac quimanahuía ininemilis masehualme cati amo teno quichijtoque. Pero se testigo cati tacajcayahua san istacati.

26 Masehualme cati quiimacasij huan quitepanitaj TOTECO itztoque ica temachili, huan ininconehua nojquiya momanahuise ipan TOTECO.

27 Quema se masehuali quiimacasi huan quitepanita TOTECO eltoc quej se ameli cati temaca se cuali nemilisti, huan quimanahuía cati eltoc nechca miquilisti.

28 Quema tahuel momiyaquilíaj masehualme ipan se tali, inintanahuatijca mohueyichihua.

Pero quema mocahuaj san se quesqui masehualme ipan ital se tayacanquet, tantiyas itequitcayo.

29 Se masehuali cati amo cualani nimantzi, quinextía para talnamiqui. Pero se cati nimantzi cualani quinextía ihuihuiyo.

30 Quema se masehuali quipiya tasehuilisti ipan iyolo, nopa tasehuilisti quimaca se nemilisti cati huejcahuas ipan ni taltipacti. Pero sintia tiquixtocas cati sequinoc quipiyaj, quicuas moomiyo quej se cocolisti huan amo tihuejcahuas.

31 Cati quitaijyohuiltía se cati teicneltzi quixpathano TOTECO Dios cati quichijchijqui. Pero cati quintasojta cati teicneltzitzti quinextilía TOTECO tatepanitacayot.

32 Masehualme cati amo quitepanitaj TOTECO motzontamiltise ica inintajtacolhua. Pero cati itztoque xitahuaque iixpa TOTECO motemachíaj ipan ya cati hueli quinmanahuis ten miquilisti.

33 Talnamiquilisti onca ipan iniyolo masehualme cati talnamiquij. Pero amo onca talnamiquilisti ipan iniyolo cati huihuitique.

34 Quema nochí masehualme ipan se tali monejnemiltíaj xitahuac, sequinoc quihueytalíaj ininal. Pero quema masehualme tajtacolchijtinemij, quihualiquilíaj pinahualisti.

35 Se tanahuatijquet yolpaqui ica itequipanojcahua cati talnamiquij huan quimatij taya quichihuase. Pero sintia se itequipanojca quihualica pinahualisti, quiajsis icualancayo nopa tayacanquet.

15

1 Quema se acajya quinanquilía ica cuali, se cati cualantoc, nimantzi quiyoltalía. Pero sintia quinanquiliis chicahuac, achi más quicualanca-macas.

2 Se cati talnamiqui quicualtalía icamanal para ma quiyolilti paquillisti. Pero se cati huihuitic san camanalti huihuiyot cati amo teno ipati.

3 TOTECO itztoc campa hueli huan quitachilía taya quichihuaj nochí masehualme. Quintachilía cati quichihuaj masehualme cati amo quitepanitaj TOTECO huan taya quichihuaj cuajcualme.

4 Se masehuali cati camanalti ica camanali cati yamanic temaca se nemilsti cati cuali. Pero cati quijtohua camanali cati tecajcayahua nelía teyol-cocohua.

5 Se telpocat cati huihuitic amo quinequi quitacaquiliis itata quema quitacahualtía. Pero se cati talnamiqui, yaya quena. Quicaqui huan quichihua cati itata quiilhuía.

6 Ipan ichaj se masehuali cati itztoc xitahuac onca miyac ten ica panos. Pero se masehuali cati amo quitepanita TOTECO san quitani taohuij-cayot.

7 Inincamanal talnamiquini temaca talnamiquilisti. Pero masehualme cati amo quitepanitaj TOTECO amo quipiyaj talnamiquilisti para temacase.

8 TOTECO amo quinequi quiitas nopa tacajcahualisti cati fiero masehualme quimacaj. Pero quimaca miyac paquillisti quema motatajtíaj masehualme cati itztoque xitahuaque iixpa.

9 TOTECO amo quinequi quiitas nopa ojti cati
quitoquilíaj amo cuajcualme. Pero yaya quinic-
nelía cati quinequij quitoquilise cati nelxitahuac
ipan nochí cati quichihuase.

10 TOTECO quintatzacuiltis chicahuac cati
quicajtehuaj iojhui TOTECO para sempa
quichihuase cati fiero. Pero sintá se amo
quinequis quicualtalis inemilis quema TOTECO
quixitahua, TOTECO quintzontamiltis.

11 TOTECO quimati nochí cati pano ica cati itz-
toque ipan ostot huan campa micta, huajca noja
más quimati sesen piltamantzitzí cati eltoc ipan
iniyolo masehualme.

12 Se cati tehuihuiita amo quiicnelía cati
quitacahualtí huan quinequi quixitahuas. Amo
quinequi quinechcahuis cati talnamiquij pampa
amo quinequi ma quiixcoilhuica para amo cuali
cati quichihua.

13 Se cati yolpactoc, tenextilía ipaquilis pampa
huetzca, huan se cati moyoltequipachojtoc, ni-
mantzi quinextíá ipan ixayac.

14 Iyolo se masehuali cati talnamiqui tahuél
quinequi quimachilis más tamanti. Pero se cati
huihuitic san moixhuitíá ica más huihuiyot.

15 Se masehuali cati yolcuesihui quiita nochí
tonali para nelfiero, pero se cati yolpactoc, moj-
mosta quiita quej elisquía ilhuit.

16 Más cuali para se masehuali elis teicneltzi
huan quiimacasís huan quitepanitas TOTECO,
huan amo para quipiyas miyac tomi ica tequipa-
choli.

17 Achi más cuali se quicuas san quilit ipan se cali campa onca taicnelijcayot, huan amo quicuas toro nacat campa onca cualanti.

18 Se masehuali cati nimantzi cuelani quintate-huiltia sequinoc, pero se cati quihiya iyolo, yaya quinyoltalía.

19 Se cati tatzihui quiohuijmati nochi tamanti ipan ni nemilisti huan quiita nochi tamanti quej huitzti cati ohui para quipanos, pero masehualme cati quichihuaj cati xitahuac quiitaj para amo ohui nopa tamanti cati quinixnamictihuala. Ininemilis eltoc quej se ojti cati patahuac.

20 Se telpocat cati talnamiqui quinmaca miyac paquilisti itatahua, pero se cati huihuitic quincualancaita.

21 Se cati amo talnamiqui mopaquilismaca ica nochi huihuiyot cati quichihua, pero se cati quimachilia miyac tamanti quichihua campeca para moxitahuas huan quitoquilis nopa ojti cati cuali.

22 Quema se acajya quinequi quichihuas se tamanti pero amo motatzintoquilía quenicatza quichihuas o sintia cuali para quichihuas, amo quisá cuali itequi. Pero quema se motajtánia miyac consejos ica talnamiquini, nochí cati quichihua quisá cuali.

23 Nochi masehualme quinpactía quema se tananquilía cuali huan quinpalehuía sequinoc ma quimachilise más. Nelía cuali quema se acajya quimati quenicatza quicamanalhuis se masehuali huan quiilhuis cati quinamiqui ipan nopa talojtzi quema monequi.

24 Masehualme cati talnamiquij quitoquilíaj nopa ojti ica huejcapa cati tehuica ilhuicac campa onca nemilisti. Inijuanti quihuejcacajtoque nopa ojti cati tehuica mixta.

25 TOTECO quisosolos ininchaj masehualme cati mohueyimatíj huan nochi tamanti cati quipiyaj, pero yaya quimocuitahuía nochi cati iniaxca si-huame icnotzitzi.

26 TOTECO amo quinequi quiitas cati fiero moyolilhuíaj amo cuajcualme, pero quipiya paquilisti ica cati quijtohuaj masehualme cati yoltapajpac-tique pampa cuali inincamanal.

27 Se masehuali cati quinequi tacajcayahuas huan moaxcatis cati seyoc iaxca quihualicas tao-huijcayot ipan ihuicalhua, pero cati amo quiselis tomi cati amo quitantoc itztos ica cuali.

28 Se masehuali cati itztoc xitahuac iixpa TOTECO moyolilhuía quenicitza tananquilis quej quinamiqui, pero se masehuali cati amo quitepanita TOTECO ontananquilijtiquisa nimantzi ica camanali cati amo cuali.

29 TOTECO mohuejcatalijtoc ten masehualme cati fiero ininemilis, pero quintacaquilía quema motatajtíaj o momaijtohuaj masehualme cati xitahuaque iixpa.

30 Quema se acajya ixpaqui, quinchihua se-quinoc ma quipiyase paquilisti ipan iniyolo, huan quema se quihualica se camanali cati cuali, quin-maca masehualme chicahualisti hasta ipan in-iomiyó.

31 Nopa masehuali cati quichihuila cuenta quema seyoc quimaca consejo para quimanahuis

inemilis, teipa itztos inihuaya cati nelía talnamiquij.

32 Cati amo quichihuilá cuenta cati quinequi quitalnamictis, ica iselti mochihuilá cati fiero. Pero se cati quitacaquilá quema seyoc quixitahuasnequi, quimachilis miyac tamanti.

33 Sinta tiquimacasi huan tijtepanita TOTECO mitzchihuas tielis titalnamiqui. Huan cati moechcapantalía iixpa ya, teipa quipantis tatepanitacayot.

16

1 Tojuanti hueli tijcualtalise ipan toyolo taya tijchihuase, pero TOTECO quiijtos sinta cuali o amo para tijchihuase cati timoilhuijtoque.

2 Se masehuali quiita nochí tamanti cati quichihua para cuali, pero TOTECO quitachilá iyolo huan quiita para ten quichijqui cati quichijtoc.

3 Nochi cati ta timoilhuía para tijchihuas xijcahuili imaco TOTECO para mitzyacanas, huan yaya mitzpalehuis para quisas cuali cati timoilhuijtoc.

4 TOTECO quichijchijqui nochí tamanti para se tamanti. Quinchijchijtoc fiero masehualme para ma quiselica intatijyohuilis ipan nopa tonali cati amo cuali.

5 TOTECO quincualancaita nochí masehualme cati mohueyimati, huan temachti quiselise inintatzacuiltlis.

6 Para se quixitahuas cati tajtacolchihua monequi miyac teicnelijcayot huan camanali cati

melahuac. Huan quema yaya pehuas quiimacas-s huan quitepanitas TOTECO, moiycatalis ica tamanti cati amo cuali.

⁷ Quema iojhui se masehuali quipactía TOTECO, hasta icualancaitacahua nojquiya moyoltalise ica nopa masehuali.

⁸ Más paqui se masehuali cati quipiya pilquentzi tomi, pero monejnemiltía xitahuac, que se cati quitantoc miyac tomi ica tacajcayahualisti.

⁹ Tojuanti hueli timoyolilhuíaj canque cuali tiyase, pero yaya TOTECO cati quijtohua sinta nopona tiyase o amo.

¹⁰ TOTECO quipalehuía se tanahuatijquet para quijtos cati xitahuac quema tetajtolsencahua, huajca amo quinamiqui para istacatis huan mocuapolos.

¹¹ TOTECO quinequi para nochí tamanti tata-machihuali cati motequihuía ma eli xitahuac. Yaya TOTECO cati quichihua nochí tanahuatili huan nochí masehualme monequi quichihuase cati yaya quijtojtoc.

¹² TOTECO amo quinequi quiitas se tanahuatij-quet cati quichihua cati amo cuali, pampa se cati quipiya tequiticayot monequi itzlos xitahuac para itanahuatíhua quipiyas chicahualisti.

¹³ Tanahuatiani yolpaquij quema inimasehual-hua quijtohuaj cati xitahuac. Quinicnelíaj cati quinyolmelahuaj senquisa cati melahuac.

¹⁴ Icualancayo se tanahuatijquet huelis quichi-huas para ma miqui se masehuali, pero se cati talnamiqui quiyoltalis.

¹⁵ Masehualme cati quichihuaj cati quipactía se tanahuatijquet quiselíaj miyac tamanti cati cuali.

Inijuanti paquij quej quema se quiita para huala mixti quema amo huetztoc at para miyac tonali.

¹⁶ Nelía más cuali sintia tijtemos talnamiquilisti huan tijmachilis miyac tamanti, huan amo oro o plata.

¹⁷ Iniojhui cati itztoque xitahuaque moiyo catalía ten campa onca cati amo cuali. Cati momocuitahuía para amo quichihuas cati amo cuali quimocuitahuía inemilis.

¹⁸ Cati achtohui mohueyimati, teipa motepotanis, huan cati achtohui motepanita teipa huetzis huan tahuel mococos.

¹⁹ Más cuali timoehcapantalí huan tiitztos inihuaya teicneltzitzí, huan amo timochihuas titominpiya ica tamanti tachecti inihuaya cati mohueyimati.

²⁰ Se masehuali cati quitacaquilía tamachtili quipantis cati cuali. Huan TOTECO quintiochihiwas cati ipan ya motemachíaj.

²¹ Talnamiquini moixmatij pampa quimachilíaj miyac tamanti. Huan cati quitequihiúaj cuajcuali camanali quema camanaltij achi más mochihuaj talnamiquini.

²² Sinta tijpiya tamachilisti para timonejne-miltis nelía cuali, eltoc quej se ameli moyoltipa cati temaca se nemilisti cati yejyectzi. Pero nojquiya huihuitique cati quichihuaj campeca quinxitahuase cati huihuitique.

²³ Pampa cuali itzonteco se masehuali cati talnamiqui, momocuitahuía ica cati quijtohua. Cuali quimati para teyoltalis huan teyolpitzahuas ica icamanal quej quinamiqui.

24 Camanali cati yamanic eltoc quej necti. Quichihuas más tzopelic monemilis huan eltoc quej se pajti cati temaca chicahualisti.

25 Onca se ojti cati masehualme quiitaj para cuali huan xitahuac, pero nopa ojti quinhuicas xitahuac campa micta.

26 Quema mayana se tequipanojquet, quipalehuía. Quichihua nopa tequipanojquet ma tequiti cuali para quipiyas itacualis.

27 Se masehuali cati amo quitepanita TOTECO quitemohua cati amo cuali cati sequinoc quichijtoque para quipanextis. Icamac eltoc quej se tilelemecti cati quitatía nochi.

28 Se tacat cati amo quitepanita TOTECO quiyoliltía cualanti. Huan se cati tetaijilhuía quinxelohua cati monelhuampochijtoque.

29 Se masehuali cati fiero inemilis quicajcayahua hasta inelhuampo. Quihuica ipan ojti cati amo cuali.

30 Ijcopi iixteyol quema moyolilhuía para quichihuas cati amo cuali. Motanatzcua para quinequisquía ma mochihua cati fiero moilhuía.

31 Nopa cuaichti eli quej se xochi corona para se masehuali cati ya huehuejtixtoc, huan mopantía campa masehualme cati monejnemiltíaj xitahuac.

32 Más cuali cati quipiya iyolo huan amo cualani que cati tahuel tetic. Más cuali cati monahuatía ica iselti para amo quichihuas cati fiero, que se cati quitani se altepet.

33 Se masehuali huelis quimajcahuas nopa pilletzitzti para quitemos isuerte, pero eltoc TOTECO cati quijtohua taya panos ipan inemilis.

17

¹ Más cuali para quipiyase san tochoj para quicuase ipan se cali campa onca tasehuilisti, huan amo para quipiyase miyac tacualisti ipan se cali campa nochí mocualaníaj.

² Se tequipanojquet cati talnamiqui quipiyas tequiticayot para quinahuatis itelpoca iteco cati amo tatepanita. Nopa cuali tequipanojquet quixelos inihuaya nopa icnime cati iteco quicajtehuas.

³ Ica tit quipajpacaj plata huan oro para ma mocahua senquisa cuali, pero yaya TOTECO quiyejyecohua huan quipajpaca toyolo.

⁴ Amo cuajcualme huan istacatini quitacaquiláj camanali cati fiero. Quichihuiliáj cuenta inincamanal masehualme cati quinequij quintzontamil-tise sequinoc.

⁵ Cati quipinajtía cati teicneltzi quiixpano TOTECO. Huan nochí cati quihuetzquiláj se cati taijyohuía, TOTECO temachti quintatzacultis.

⁶ Se huehue tacat yolpaqui por iixhuihua. Coneme yolpaquij por intatahua.

⁷ Se huihuitacat amo quinamiqui camanaltis ica miyac talnamiquilisti. Huan se tanahuatijquet amo quinamiqui istacatis.

⁸ Se cati quitaxtahuía se tequichijquet ixtacatzi para ma quipalehui moilhuía para quipiya suerte. Moilhuía para nochí quisas cuali para ya campa hueli yahui.

⁹ Cati amo tenextilía itajtacol ihuampo cati quiixpano quipiya teicnelijcayot, pero cati talojtzitzi tematiltía quihuejcatalía ihuampo.

¹⁰ Se cati talnamiqui más nimantzi moxitahua quema seyoc san se quentzi quitakahualtía, huan

amo quej moxitahua se cati huihuitic masque quimaquilise cien hueltas icuitapa.

11 Masehualme cati amo tatepanitaj quitemohuaj cati amo cuali para quichihuase, pero TOTECO quintitanilis itayolmelajca cati temajmati para quintatzacuiltis chicahuac.

12 Más cuali elisquía sinta timonamiquisquía ica se tena osa cati quiichtequilijtoque ipilcone hua, huan amo ica se cati huihuitic cati quinextijtoc ihuihuiyo iniixpa miyac masehualme.

13 Cati quicuepilis ica cati amo cuali se cati quichihuilijtoc cati cuali, nochipa quipiyas tatelchihualisti ipan ichaj.

14 Se cati quipehualtía se cualanti eltoc quej se cati quitzintapohua se hueyat para ma pano ipan ichaj, elis ohui teipa para quitilquetzas. Huajca achi cuali xijcahua cualancayot huan amo xijpehaulti para ximonajnancibili ica seyoc.

15 TOTECO quincualancaita cati quitapoypolhuíaj se cati melahuac quihuica tajtacoli, huan nojquiya quincualancaita cati quitatzacuiltíaj se cati amo teno quichijtoc.

16 San tapic para titaxtahuas para ma momachtis más se cati huihuitic, cati ipan iyolo yon quentzi amo quipiya o amo quinequi talnamiqulisti.

17 Se tocualhuampo temachti techicnelía nochipa. Quema onca taohuijcayot techpalehuía quej elisquía se toicni.

18 Amo quipiya talnamiqulisti cati quijtohua quiixtahuas cati ihuampo tahuica. Huihuitic

cati mocultía quiixtahuas cati seyoc tahuica, o temacas ifirma para seyoc.

¹⁹ Cati quipactía tanajnanquilis quipactía tajta-colchihua. Cati mohueyimati ica iselti motemo-huilía taohuijcayot.

²⁰ Se cati fiero iyolo amo quema quipantis cati cuali, huan se cati tacajcayajtinemi ica cati quijj-tohua quipantis cati amo cuali.

²¹ Nelía se hueyi tequipacholi quipantis itata se telpocat cati tahuel huihuitic. Amo quema yolpaquis itata se cati amo tatepanita.

²² Yolpaquilsti tepalehuía quej elisquía se cuali pajti. Pero quema se masehuali moyolcuesohua quitamiltía ichicahualis quej se cocolisti cati qui-huatza iomiyo.

²³ Tequichihuani cati amo cuajcualme quiselíaj taxtahuili ixtacatzí, huan yeca tatajtolsencahuaj amo xitahuac.

²⁴ Masehualme cati talnamiquij senquisa quitachilíaj talnamiquilsti pampa quinequij quipiyase más, pero cati huihuitique campa hueli tachixtiyahuij pampa amo quimatij taya quinequij.

²⁵ Se telpocat cati amo quitepanita TOTECO quincuesolmaca itatahua. Quichihua ininemilis ma eli ohui.

²⁶ Amo quinamiqui para se quitalilis tatzacuiltyli se cati amo taixpanotoc. Yon amo quinamiqui quihuitequise se cati nemí xitahuac.

²⁷ Se cati quimocuitahuía icamac para amo camanaltis miyac, yaya quipiya talnamiquilsti. Se masehuali cati quimachilía miyac tamanti amo nimantzi cualani.

28 Masque huihuitic, se masehuali nesi para talnamiqui quema amo molinía. Quema se quitzaca cu icamac nesi quej tamachilía.

18

1 Se cati itzcuimit moiyo cacahua ten sequinoc masehualme pampa sanmoilhuía cati yaya iselti quinequi. Monajnanquilía ica nochí cati cuali inintalnamiquilis.

2 Masehualme cati huihuitique amo teno quinequij quiyecose, san quinequij tepohuilijtinemisse cati eltoc ipan iniyolo.

3 Se tacat cati fiero inemilis quimati tehuihuita. Nimantzi pehua tepinahaultía huan tanajnanquilía pampa ayecmo teno quitepanita.

4 Icamanal se tacat cati talnamiqui eltoc quej hueyat cati tahuel huejcata ica se at cati temaca se cuali nemilisti. Quej meya miyac at ipan se ameli, icamanal tepalehuía huan temaca talnamiquilisti.

5 Tajtacoli sinta se juez quipalehuis se cati amo cuali quichihua. Nojquiya amo cuali sinta se juez quitatzacuiltis se cati amo teno quichijtoc.

6 Cati huihuitique quijtohuaj camanali cati talojtzitzi quipehualtía tanajnanquilisti. Inincamanal quihualica miyac tatehuillisti.

7 Ica icamac se cati huihuitic monenpolos. Ica cati quijtohuaj moijilpía ipan taohuijcayot.

8 Icamanal se cati ixtacatzi mitzilhuis se camanali cati ica quiejelnamiqui seyoc, eltoc quej se tamanti ajhuiyac ipan mocamac, pero cati quiejelnamiqui, calaqui hasta más ipan iyolijtic para quicocos.

9 Se masehuali cati tatzihui ipan itequi eltoc san se ica se cati san quinempolohua tamanti cati iaxca iteco.

10 TOTECO eltoc quej se huejcapantic tepancali campa masehualme hueli momanahuise. Cuajcualme yahuij campa TOTECO huan ayecmo aqui hueli quincocos.

11 Cati tominpiyaj moilhuíaj para inintomi temachti huelis quinmanahuis ica miquilisti. Ipan inintalnamiquilis inintomi quinmaca temachili quej se hueyi altepet cati cuali tzactoc ica se tepamit cati tilahuac, pero mocajcaya jtoque.

12 Quema se masehuali mohueyimati, huetzis ipan pinahualisti, pero quema se moechcapantala, quihualiquilía tatepanitacayot.

13 Nelía se huihuiyot huan se pinahualisti sinta titananquilis quema noja ayemo tijcactoc nochí cati quichihuaj campeca para mitzilhuise.

14 Se masehuali hueli quijiyohuis se cocolisti ipan itacayo, pero sinta se tahuel quiyolcocos, nelía ohui quijiyohuis.

15 Se masehuali cati talnamiqui nochipa quinequi quimachilis tamanti yancuic. Nochipa tacactoc para quicaquis más talnamiquilisti.

16 Se masehuali cati temaca nemacti quitapohua miyac caltepamit para ipan calaquis. Huan huelis ajsis hasta iniixpa huejhueyi masehualme.

17 Nesi xitahuac cati quijtohua nopa achtohui masehuali cati monextía iixpa se juez para momanahuis, pero teipa hualas seyoc huan tenextilis para nelía taixpanotoc.

18 Nopa tequichihuani hueli quiquixtise suertes para quimatisse quenicatza quisencahuase se cualanti cati ohui. Ica suertes tamis camanali.

19 Nelía ohui para sempa timohuampojchihuas ihuaya se moicni cati tiquixpanotoc, huelis más amo ohui para tijtanis se altepet cati yahualtic tzactoc ica tepamit. Cualanti quixelohua cati mohuampojchijtoque quej se caltemit ica candado quixelohua cati calijític huan calteno.

20 Se cati quinpalehuía sequinoc huan temaca cuali tamachtili, quitemitia ten ya iyolo quej se tacualisti cati quiixhuitía ijiti. Quema se masehuali quijjohua cati quinamiqui, momaca miyac paquilisti.

21 Se huelis quipantis miquilisti o se cuali nemilisti por cati quijjohua. Huan se cati tahuel quinequi camanaltis quiselis cati quitantoc ica icamanal masque cuali o amo.

22 Se tacat cati mocuilia se sihuat quipantía se tamanti cati cuali. Nopa sihuat eltoc se tatiochihualisti cati TOTECO quititanilia.

23 Se teicneltzi motajtanía tapalehuili ica cuali, pero nopa masehuali cati tominpiya quinanquilía chicahuac.

24 Se masehuali cati quinequi quinpiyas ihuampoyohua, monequi quinpalehuis sequinoc quej mochihuaj masehualme cati mohuampojchijtoque. Pero itztoque tohuampoyohua cati más techicnelíaj que toicnihua.

19

1 Más cuali se masehuali teicneltzi cati monejnemiltía xitahuac huan amo se huihui masehuali

cati amo quitepanita TOTECO.

² Mahuilili sinta se acajya nimantzi quinequi quichihuas se tamanti cati amo quimati. Huelis nima huetzis ipan tajtacoli.

³ Se masehuali ica ihuihuiyo quicuapolohua iohui cati cuali, huan teipa quitajtacoltía TOTECO ica cati quipanotoc.

⁴ Se masehuali cati tominpiya quinpiya miyac ihuampoyohua, pero se cati teicneltzi hasta ihuampoyohua quitahuelcahuaj.

⁵ Se testigo cati san tacajcayahua quiselis itatzacuiltlis, huan cati istacatij iixpa se juez amo huelise momanahuise.

⁶ Miyac masehualme quitemohuaj se cati hueyi iyolo ica cati teicneltzitz para ma quinchihuili se favor. Nochi quinequij mohuampojchihuase ihuaya.

⁷ Sinta hasta iicnihua se teicneltzi quitahuelcahuaj, huajca achi más ihuampoyohua amo quinequise quiitase. Cati teicneltzi quintemohua huan quinojnotza ihuampoyohua, pero inijuanti amo quichihuiláj cuenta.

⁸ Se cati mochijtoc talnamiqui moicnelía. Huan se masehuali cati quichihua campeca para mojmosta quimachilis más, quisas cuali ipan nochia cati quichihua.

⁹ Se testigo cati quijtohua cati amo melahuac iixpa se juez quiselis se tatzacuiltli. Huan cati istacati mocuapolos para nochipa.

¹⁰ Amo cuali nesi para se cati huihuitic mohueyichihuas huan quipiyas miyac ricojyot. Yon amo nesi cuali para se tequipanojquet quinahuatlis tanahuatiani taya ma quichihuaca.

11 Se masehuali cati quimachilía amo yolquentzi. Masehualme quitepanitaj pampa amo quichihuilía cuenta quema sequinoc quiixpanoj.

12 Icualancayo se tanahuatijquet nelmahuilili quej tijcaqui nanalca se león monechca. Pero quema se tanahuatijquet quipiya hueyi iyolo huan quinequi tepalehuis temaca paquilsti quej ajhuechti cati huetzi ipan sacapetat.

13 Se telpocat cati huihuitic quimaca itata miyac tacuajcualoli. Huan se sihuat cati mojmosta quinajnanquilía ihuehue itztoc quej se tacuajcualoli cati amo hueli caxani.

14 Se tetaj hueli quiaxcatis iconse cali huan noch tamanti cati ica moricojchihuas, pero san TOTECO hueli quimaca se tacat isihua cati cuali italnamiquilis.

15 Nopa masehuali cati tatzihui tahuel cochi, pero teipa tahuel mayana pampa amo tequitic.

16 Cati quintepanita itanahuatilhua TOTECO quimocuitahuía inemilis, pero cati quintahuelcahua itanahuatilhua miquis.

17 Quema se quipalehuía se cati teicneltzi eltoc quej quitanejtía TOTECO. Huan yaya mitztaxtahuis por noch cati cuali tijchijtoc.

18 Xiquinxitahua moconehua quema noja onca pajti huan quema ayemo quipiyaj miyac xihuit. Sinta amo tiquintalnamictía eltoc quej tijnequi ma miquica.

19 Se masehuali cati sencualantoc quiselis nopa tatzacuiltli cati quinamiqui, huan sintia

tijmanahuis para ma amo quiseli tatzacuiltili, huajca noja más fiero quichihuas.

20 Xijtacaquili nochí consejos huan xijseli inincamanal cati mitztacahualtíaj, huan tijpiyas miyac talnamiquilisti cati huejcahuas nochí monemilis.

21 Se masehuali hueli moyolilhuía miyac tamanti para quichihuas, pero cati TOTECO quiijtojtoc para oncas, ya nopa cati oncas.

22 Masehualme cati tetasojtaj quipiyaj yolpaquilisti. Más cuali tielis se teicneltzi huan amo se istacatiquet.

23 Cati quiimacasi huan quitepanita TOTECO quipantis nemilisti. Nojquiya quipiyas temachili huan momanahuis ten cati amo cuali.

24 Itztoque sequij cati tahuel tatzihuij hasta amo quinequij momatananase para tacuase.

25 Quema se juez quihuitequi se cati tehuihuiita, sequinoc cati nojquiya tehuihuitaj quichihuilise cuenta huan moxitahuase. Huan sintá quitacahualtis se cati talnamiqui, yaya noja más talnamiquis.

26 Telpocame cati quinmaquilíaj inintatahua o quinquixtíaj ininanahua, nelía mopinahualtíaj iniixpa nochí sequinoc huan quinpinahualtíaj inintatahua.

27 Notelpoca, sintá ayecmo tijtacaquilis cati mitztalnamictía, huajca timohuejcatalis ten nopa cuali talnamiquilisti.

28 Nopa testigo cati istacati iixpa se juez quinhuetzquilía cati quinequij tetajtolsencahuase xitahuac. Nochi cati quiijtohuaj amo cuajcualme eltoc fiero.

29 Tatzacuítlisti quinchiya cati quinhuihuiitaj sequinoc. Huan cati huihuitique quinhuitequise inincuitapa miyac huelta.

20

Tamachtili para amo taise

1 Cati quii vino huan tailisti cati chicahuac mochihua se cati tehuihuiita huan tatehuía. Cati moihuintá ica tailisti nelía huihuitic.

2 Se tanahuatijquet cati tahuel cualani hasta mosisinía eli quej nanalca se león. Huan cati quicualancamaca, quipolohua inemilis.

3 Masehualme quitepanitaj se cati moiycacahua ten tanajnanquilisti, pero se cati huihuitic talojtzitzí quinequi quipehualtis cualanti.

4 Se masehuali cati tatzihui amo momiltía quema ipohual, huan amo teno quipiya quema ajsi tonali para pixquisti.

5 Masque tahuel huejcata ipan iyolo se masehuali eltoc nopa tamanti cati cuali cati yaya quinequi quichihuas, se cati talnamiqui quimati quenicatza quipalehuis para quipanextis.

6 Miyac masehualme mitzilhuise para huelis timotemachis ipan inijuanti para elise monelhuampoyohua ipan ten hueli talojtzi, pero nelía ohui tijpantis se cati hueli ipan timotemachis.

7 Masehualme cati cuajcualme monejnemiltíaj xitahuac, huan TOTECO quintiochihuas inincone-hua.

8 Quema se tanahuatijquet mosehuía ipan caltanahuutili para tetajtolsencahuas, quitachilía ica miyac cuidado sesen tamanti cati masehualme quiilhuiáj para huelis quitamiltis cati amo cuali.

⁹ Amo aqui ica iselti huelis quiijtos: “Nimoyol-pajpactoc huan ama amo niypiya yon se notajatocol.”

¹⁰ TOTECO amo quinequi quiitas yon se tata-machihuali cati amo ajsitoc. Quicualancaita cati quitequihuía ome hilos para quitamachihuas tali o ome tamanti teme para amo temacas se kilo ajsitoc.

¹¹ Sinta cuali quichijtinemi se masehuali, masque yaya se conet, nochí quiitaj para itztoc xitahuac. Nochi quiitaj sintá monejnemiltía quej monequi huan sintá tapajpactic iyolo iixpa TOTECO.

¹² TOTECO techmacatoc tonacas para titacaquise huan toixteyol para titachiyase. Nochi ome quisencajtoc TOTECO.

¹³ Amo xisencoccohto para amo timochihuas tite-icneltzi. Más cuali xiisa cualca huan xitequiti chicahuac para tijpiyas nochí cati tijnequi para tijcuas.

¹⁴ Se tacojquet quema tacohua quiijtohua: “Inin amo cuali” para ma quitemohuilise ipati, pero quema ya quicojtoc se tamanti, camanalti cuali pampa quipantijtoc cati nelcuali.

¹⁵ Onca oro huan piltetzitzi cati yejyectzitzi cati nelía patiyo ipan ni taltipacti, pero achi más ipati se masehuali cati talnamiqui huan cati camanalti ica camanali cati senquisa cuali.

¹⁶ Sinta se masehuali mocultía para taxtahuas por seyoc masque amo quiixmati o se huejca ej-quet, xijpiya miyac cuidado ica ya. Achi cuali xijcuili itaque o cati ipati cati iaxca hasta mitz-tamitaxtahuis.

17 Cati istacati para quicuis o quiichtequis se pantzi nelía quiajhuiyacmati, pero teipa ipan ica-mac mocuepa quej cuajnexit.

18 Amo xijchihua cati timoilhuijtoc tijchihuas hasta quema ya timotatzintoquilis ica sequinoc sinta cuali cati timoilhuá. Amo xicalaqui ipan se tatehuilisti hasta tiquintajtanilitosa sequinoc para ma mitzconsejomacaca.

19 Se cati quipactía teejelnamiqui amo hueli quiajocui se camanali cati tijpohuilis ixtacatzí, huajca más cuali amo ximohuampojchihua ihuaya.

20 Se masehuali cati quitelchihua itata o inana miquis ipan tzintayohuilot campa más temajmati.

21 Se cati quitani miyac tamanti ipan se talo-jtzi quema sanoc telpoca tacat, amo cana se tati-ochihualisti pampa ayemo quimati quenicatza quimocuitahuis.

22 Amo ximoilhui para timomacuepas ica cati mitzchihuiláj ten fiero. Más cuali xijcahuili imaco TOTECO huan yaya quisencahuas cuali huan mitzmanahuis.

23 TOTECO amo quinequi quiitas tatamachihuali cati amo ajsi. Amo cuali cati quitamachihua se tamanti huan tacajcayahua.

24 San TOTECO quijjtohua taya tijpantise ipan toojhui, huajca ¿quenicatza hueli timasehualme ti-jmachilise cati techpano ipan tonemilis?

25 Mahuilili sinta se acajya quitencahuas iixpa TOTECO para quimacas se tamanti, huan teipa motatzintoquilia sinta quena o amo quichihuas quema ya moijilpitoc para quichihuas.

26 Se tanahuatijquet cati talnamiqui quinitzquis amo cuajcualme huan quintatzacuiltis chicahuac.

27 TOTECO techmacatoc totonal cati quimati nochí catí timoilhuiáj ipan toyolo. Eltoc quej se taahuili cati quitemojtinemi nochí cati eltoc ipan tojuanti.

28 Se tanahuatijquet cati quinicnelía imasehualhua huan quinchihuilá cati xitahuac, quipiya tequiticayot ipan se itanahuatilis cati nelía temachti.

29 Telpocame mohueyimatij pampa quipiyaj tetili, huan cati huehuentzitzí paquij pampa ya quiaxitijque miyac xihuit huan cuaichyoltoque.

30 Se tatzacuiltli cati nelía chicahuac ipan itacayo se masehuali cati amo cuali inemilis eltoc quej se pajti huan quichihua para ma moyolpata. Eltoc quej nopa tatzacuiltli quipajpaca hasta ipan iyolo.

21

1 Quej se milchijquet cati quiatequía imil qui-huica nopa aojti campa quinequi ma yahui, quej nopa TOTECO quiyolpata se tanahuatijquet para quiyacanas campa ya quinequi.

2 Sese masehuali quiita para xitahuac cati quichihua, pero TOTECO quitachilía sesen toyolo para quiitas para ten tijchihuaj cati tijchihuaj.

3 Más quipactía TOTECO quema tijchihuaj cati xitahuac huan cati cuali, huan amo nopa tacajc-ahualisti cati tijmacaj.

4 Cati mohueyimati huan motepanita, huan nopa amo cuajcualme cati san moilhuiáj cati fiero hueli quichihuase, nochí tajtacolchihuaj.

5 Cati achtohui moilhuía ica miyac cuidado quenicatza quichihuas se tamanti quiitas para quisas cuali itequi huan moricojchihuas. Pero nopa masehuali cati momajcahua nimantzi huan quej hueli quichihua se tequit amo quicualtilis huan yaya mochihuas se teicneltzi.

6 Nopa tomi cati se istacatiquet quitani ica iistacaticayo amo huejcahuas. Nochi cati quej nopa quitanij inintomi quitemohuaj miquilisti.

7 Nopa fiero tamanti cati quichihuaj amo cuajcualme quintzontamiltis, pampa inijuanti amo quinequij quichihuase cati xitahuac.

8 Masehualme cati amo quitepanitaj TOTECO nemij ipan se ojti cati huijcoltic, pero masehualme cati cuajcualme mojmosta quichijtinemij cati xitahuac.

9 Más cuali para tiitztos ipan se tapamit moselti, huan amo ipan se cali yejyectzi ica se sihuat cati sencualantoc.

10 Ipan iyolo se masehuali cati amo quitepanita TOTECO quinequi quichihuilis cati icalnechca ten fiero. Amo quema moilhuía para quitasojtas.

11 Se cati huihuitic san mortalnamictía quema quinita quintatzacuiltíaj cati tehuihuiitaj. Pero quema se quitacahualtía se cati talnamiqui, nimantzi achi más mochihua talnamiqui.

12 TOTECO cati itztoc xitahuac quimati cati fiero quichihuaj amo cuajcualme ipan ininchajchaj huan quichihuas para nenpolihuise.

13 Se cati amo quichihuila cuenta se cati tecneltzi quema quitajtanía se tapalehuili, amo quipantis tapalehuili quema yaya tahuel quitemos.

14 Se masehuali huelis quiyoltalis cati tahuel cualantoc ica se nemacti ixtacatzi. Huan masque se quinextijtoc miyac icualancayo, se taxtahuili ixtacatzi quitamiltis.

15 Masehualme cati cuajcualme paquij quema tequichihuani tetajtolsencahuaj xitahuac. Pero quinchihuaj ma momajmatica miyac masehualme cati amo quitepanitaj TOTECO.

16 Se cati quitahuelcahua italnamiquilis huan yahui ipan se ojti cati amo cuali, quipantis miquilisti.

17 Cati san quinenpolohua itomi ica ten hueli tamanti cati quipactía teipa elis se teicneltzi. Huan cati san mocohuía tailisti huan taajhuiyacayot para ica quiajhuiyaltis itacayo amo quema elis se tominpixquet.

18 Quemantica se masehuali cati amo cuali o cati amo quitepanita TOTECO quiselía tatzacuiltyli quej ipataca se cati cuali o cati itztoc xitahuac.

19 Más cuali para tiitztos moselti ipan se huactoc tali, huan amo ihuaya se sihuat cati sencualantoc huan tatelchihua.

20 Se masehuali cati talnamiqui quiajocui itomi huan cati patiyo quipiya, pero se cati huihuitic nimantzi quinenpolohua nochí cati quipiya.

21 Cati quichihua campeca para quichihuas cati nelxitahuac huan para tetasojtas, quipyas nemilisti, ricojyot huan tatepanitacayot.

22 Soldados cati talnamiquini hueli quitanise se altepet masque quipiya imasehualhua cati tahuel tejtetique. Quena, masque inijuanti motemachíaj ipan itepa nopa altepet para quinmanahuis, talnamiquini hueli quitamisosolose.

23 Se cati quipiya miyac cuidado ica cati quiijtohua, momanahuis para amo mocalaquis ipan cuesoli.

24 Masehualme cati pano motepanitaj, nojquiya tepinajtiaj huan tehuihuiitaj pampa mohueyimatiij. Inintoca teechcapantaliani.

25 Se masehuali cati tatzihui tahuel quiixtoca miyac tamanti huan yeca huetzti tatzinta. Pero amo quinequi tequitis ica imax huan quipiyas se nemilisti cati cuali.

26 Cati tatzihui nochipa itztoc itzcuimit huan quinequi sequinoc ma quimacaca tamanti. Pero masehualme cati itztoque xitahuaque quipiyaj hueyi iniyolo huan temajmacaj miyac tamanti.

27 TOTECO amo quinequi quiitas nopa tacajcuhualisti cati amo cuajcualme quihualicaj. Pero achi más quincualancaita quema mochihuaj quej cuali iniyolo, pero san moiijixpataj.

28 Se testigo cati istacati iixpa se juez quinamiqui miquis. Pero se testigo cati quitacaquilía cuali ten quitatzintoquilíaj huejcahuas itztos pampa quiijtohua cati xitahuac.

29 Se masehuali cati amo quitepanita TOTECO san quiijtohua para nochí eltoc cuali masque amo cana, pero se masehuali cati itztoc xitahuac quichihua se tamanti ma eli cuali pampa monejnemiltía cuali.

30 Yon se masehuali amo huelis quitanis TOTECO. Amo ipati sintia tahuel talnamiqui, o quimachilía miyac tamanti o tahuel quicaqui consejos.

31 Ica miyac cuidado se masehuali hueli quicuitalis nochí cati monequi para quihiucas ipan se

tatehuilisti, pero yaya TOTECO cati quichihuas para tatanis.

22

¹ Más cuali para masehualme mitztepanitase pampa tijchihua cati cuali huan amo para tijpiyas miyac tomi. Más cuali mitzcualitase para tiitztoc xitahuac huan amo para tijpiyas oro huan plata hasta mocahua.

² Cati tominpixtoque huan cati teicneltzitzi san se itztoque iixpa TOTECO. Yaya TOTECO quinchichijqui nochí ome.

³ Se masehuali cati talnamiqui nimantzi momaca cuenta sintia mahuilili campa yahui huan amo pano, pero se cati huihuitic amo quichihua cuenta huan quipantía cati amo cuali.

⁴ TOTECO quitaxtahuis cati moechcapantalía, huan quiimacasi huan quitepanita. Quichihuas ma moricojchihua, huan ma itzto miyac xihuit huan para nochí masehualme ma quitepanitaca.

⁵ Onca miyac taijyohuilisti huan tamanti cati mahuilili ipan iojhui se masehuali cati amo quitepanita TOTECO, pero se cati talnamiqui huan quinequi itztos miyac xihuit, mohuejcatalis ten nochí cati amo cuali.

⁶ Xijnextili mocone quema noja pisiltzi para ma yahui ipan nopa ojti cati TOTECO quisencajtoc para ya. Huan quema yaya huehuejtiyas noja nopona monejnemiltis.

⁷ Se tominpixquet quipiya tanahuatili ica cati teicneltzitzi. Huan masehualme cati quitahuiquilíaj tomi elise itequipanojcahua.

8 Se tanahuatijquet cati fiero inemilis quipantis tatzacuilty por cati quichihua, huan tamis ite-quiticayo cati ica temajmatiyaya.

9 TOTECO quitiochihuas cati quintasojta cati teicneltzitzi, pampa quinmaca tacualisti para quicuase.

10 Quema se quinquixtía cati tehuihuiitaj, ayecmo oncas tatehuilisti, yon cualanti, huan ayecmo itztose cati tetaijilhuíaj.

11 Se tanahuatijquet mohuampojchihua ini-huaya cati cuali iniyolo. Quicualita cati camanalti ica cuali camanali pampa camanalti quej quinamiqui.

12 TOTECO quinmocuitahuía masehualme cati quipiyaj talnamiquilisti, pero yaya quinsosolhuilía cati quisencajtoque masehualme cati amo quitepanitaj TOTECO huan mocualtalíaj para quichihuase cati fiero.

13 Se masehuali cati tatzihi motejtechtía ica miyac tamanti para amo yas tequititi. Quiijtohua: “Amo niyas nitequititi pampa huelis nijnamquis se león cati nechmictis ipan ojti.”

14 Nelía mahuilili icamanal se momecatijca si-huat. Eltoc quej se ostot cati tahuel huejcata. Nopona huetzise tacame cati TOTECO quintelchijtoc.

15 Se oquichpil quichihua miyac tamanti hui-huiyot por nopa huihuiyot cati eltoc ipan iyolo, pero cati quitalnamictía ica se cuapipitzti quiquirtilis ihuihuiyo.

16 Cati moricojchihua pampa quintaijyohuiltía cati teicneltzitzi o pampa quinmaca nemacti cati ya tominpiyaj, mochihuas teicneltzi.

Nopa treinta talnamijca camanali cati nopa tal-namiquini quiijtoque Pr. 22:17—24:22

¹⁷ Xjtacaquili ni talnamijca camanali cati nimitzilhuía. Huan xijtali ipan moyolo nochí cati nimitzmachtía. ¹⁸ Pampa elis nelía yejyectzi para ta sintá ticajocuis ipan moyolo. Quena, xijtzonte-comati para nimantzi tiquelnamiquis huan huelis tijtenquixtis. ¹⁹ Pampa na nijnequi ximotemachi ipan TOTECO, yeca ama nimitzilhuijtoc nochí ni tamanti para ta tijmatis. ²⁰ Ya nimitzijcuilhuilijtoc miyac tamachtili para nimitzconsejomacas huan nimitzpalehuis xijmati miyac tamanti cati cuali. ²¹ Pampa nijnequi xijmati para temachti nopa camanali cati melahuac para huelis tiquinhuiquilis camanali cati xitahuac cati mitztitanque para tij-pantis cati melahuac.

²² Amo xiquintachtequili cati teicneltzitzi pampa amo quipiyaj tomi para se inintatempale-huijca. Yon amo xiquinchihuili cati amo xitahuac iixpa se juez. ²³ Pampa TOTECO quinmanahuis cati teicneltzitzi huan quichihuas para nochí quisas xitahuac para inijuanti. Huan TOTECO tahuel quitatzacuiltis cati quincocohuaj.

²⁴ Ximohuejcatali ten masehualme cati mosis-iníaj. Amo xinemí ica se cati sencualantoc. ²⁵ Amo nijnequi para nojquiya tijchihuas quej inijuanti quichihuaj. Hueli timocuapolos ipan tajtacoli huan timiquis.

²⁶ Amo quema ximoculti para titaxtahuas cati seyoc masehuali tahuica. Yon amo xitemaca cati moaxca para seyoc quipixtos hasta taxtahuas cati tahuica. ²⁷ Pampa quema tamis nochí cati tijpiya

para titaxtahuas seyoc icuenta, nojquiya hualase huan mitzcuilise motapech.

²⁸ Amo xiquijcueni nopa nepamit cati huejcajquiya quitalijque mohuejapan tatahua.

²⁹ Se masehuali cati cuali quimati itequi huan quichihua ica noch iyolo, yaya quintequipanos tanahuatiani. Amo quintequipanos san ten hueli masehualme.

23

¹ Quema titacua ihuaya se tanahuatijquet, xijtachili cuali taya eltoc moixpa. ² Huan masque nelía timayana, amo tahuel xiixhui. Amo xineltacua masque noch elis cuali huan ajhuiyac. ³ Amo tahuel xijnequi sesen tamanti cati ajhuiyac cati mitzmaca, pampa huelis ica mitzcajcayahuas.

⁴ Amo tahuel xijchihua campeca para titominpiyas. Amo ximotonapolo ipan ya nopa.

⁵ Pampa sintia san tomi tijtachilis, amo teno tipiyas. Quena, nopa tomi quej eltapalyolis huan patanis eltoc quej se cuatojti.

⁶ Amo xitacua ihuaya se cati itzcuimit, pampa mocuesos pampa mitztamaca. Amo xiquixtoca itacualis o itapalehuil se masehuali cati quej nopa.

⁷ Pampa yaya huelis mitzilhuis: “Xitacua huan xitai”, pero ipan iyolo amo paqui mohuaya. San mocuesos ica quesqui ipati cati tijcuajqui. ⁸ Teipa tiquisotas noch i cati tijcuajqui. San tapic elis para tijtascamatilijtoc ica yejyectzi.

⁹ Amo ximotonapolo para tiquilhuis se cati huihuitic se consejo, pampa san tapic. Yaya amo quiselis mocamanal masque nelía eli se cuali tamachtili para ya.

¹⁰ Amo xiquijcueni nopa nepamit campa ya el-toya ten huejcajquiya, yon amo xiquinichtequili inintal cati icnotzitzti. ¹¹ Pampa yaya TOTECO inintamanahuijca huan quipiya nochicahualisti. Yaya mitztelhuis huan mitztajtanis cuenta por inijuanti.

¹² Ica nochicahualisti cuenta cual tamachtili. Xijtacaquili camanali cati mitzmacas miyac talnamiquilisti.

¹³ Amo xijcahua para tijtacahualtis huan tijxitahuas mocone. Masque tijmaquilis ica se cuapipitzti, amo miquis. ¹⁴ Sinta tijxitahuas cuali, masque monequi tijmaquilis ica cuapipitzti, tijmanahuis para amo yas micta.

¹⁵ Nocone, sintia ipan moyolo timochihuas tital-namiqui, na nojquiya nelía niyolpaquis. ¹⁶ Quena, ica nochicahualisti cati melahuac huan cati xitahuac.

¹⁷ Amo quema xiquixtoca tijchihuas cati quichihuaj tajtacolchihuani. Nochipa xiquimacasi huan xijtepanita TOTECO. ¹⁸ Huan tiquitas nochicahualisti para ta. Temachti tijselis nochicahualisti tijchiya.

¹⁹ Techtacaquili, tinotelpoca, huan xieli tital-namiqui. Ximoxitahua ipan moyolo para xijtoquili iojhui TOTECO. ²⁰ Amo ximosejcotili inihuaya cati quij miyac xocomecat iayo, yon ica cati san quinپactia tacuajtose masque ayecmo mayanaj. ²¹ Pampa ihuintini huan cati amo quicahuaj tacuaj quema ya ixhuitoque moteicnelchihuaj. Huan cati tatzihuij san quipiyase iniyoyo cati tzayantoc para ica moyoyontise.

²² Xijtacaquili cati mitzilhuíaj motatahua cati mitziscaltijque. Amo xiquinhuejcamajcahua

masque ya huehuentzitzi. ²³ Xijtequihui motomi para xijtemo cati melahuac, huan para tijpiyas talnamiquilisti, huan para tijcaquis tamachtili. Quej nopa tijpiyas se motalnamiquilis cati nelcuali. Amo quema xijcahua. Xijpixto ni talnamiquilisti huan amo xijcahua para se acajya mitzquixtili. ²⁴ Itata se telpocat cati monejnemiltia xitahuac nelia yolpaqui. Nelia se paquilsti para tijmati quihuica ta moeso. ²⁵ Huajca xiquinpaquilismaca motatahua cati mitziscaltijque. Ma tahuel paqui monana cati mitztacatiltili.

²⁶ Notelpoca, ica nochí moyolo xijtoquili notamachtil cati mitzmaca talnamiquilisti. Huan xijtachili ica miyac cuidado para timonejnemiltis ipan se ojti xitahuac. ²⁷ Ximohuejcatali ten se ahuilnenca sihuat pampa itztoc quej se ostot cati mahuilili. Quena, se momecatijca sihuat eltoc quej se ostot cati tahuel huejcata huan tzocopiltic campa huetzij tacame huan ayecmo huelij momanahuiaj. ²⁸ Se sihuat quej nopa itztoc quej se tachtejquet cati motatia huan quichixtoc ajquiya huelis quicajcayahuas. Quitemohua seyoc tacat para ma quiixpano isihua.

²⁹ ¿Ajquiya taijyohuía? ¿Ajquiya quipiya tacuajcualoli? ¿Ajquiya talojtzitzti tatehuía huan quihiuaj iniixpa tequichihuani? ¿Ajquiya nochipa tetaijilhuía? ¿Ajquiya quipiya campa mococojtoc san tapic? ¿Ajquiya quipiya iixteyol hasta yayahuic? ³⁰ Inijuanti cati quijj miyac tailisti huan san quitemojtinemij para quipantise se yancuic tailisti cati achi más cococ. ³¹ Amo xiqui se taili cati cococ. Amo xijnechcahui tailisti cati tiquita nesi

para ajhuiyac o cati ya posoni pampa chicahuac.
³² Pampa teipa nopa tailisti mitzcocos quej se co-huat mahuilili cati tetanquechía. Elis quej nopa colot cati más temaca tacuajcualoli quema tecua.
³³ Quema tihuintitoc, mitzchihualtis para tiquitas miyac tamanti cati amo melahuac. Mitzchihualtis para xicamanalti cati fiero huan quej se tacat cati quipolojtoc italnamiquilis. ³⁴ Huan mitzchihualtis para xinejnemi campa hueli quej tiitztosquía tatajco hueyi at, o quej timotatzquilijtos ipan imacuayo se hueyi cuahuit campa san timohuisohua pampa amo tijmati canque tiizztoc. ³⁵ Huan teipa tiquijtos: “Nechhuitejque huan nechcocojque, pero amo nimomacac cuenta, yon amo nijmachili sinta cococ. Huajca quema nisas se quentzi, sempa niyas huan nijtemoti más tailisti para nquis.”

24

¹ Amo xiquixtoca cati quichihuaj amo cuajcualme, yon amo xijnequi tiitztos inihuaya.
² Pampa inijuanti mojmosta san moilhuíaj taya hueli quiichtequise. Quema camanaltij, san cati fiero quiijtohuaj.

³ Pero talnamiquini ica inintalnamiquilis quichijchihuaj se cali, huan ica inintaixmatilis quimatiq quitalilise itzinpehualtil para elis nelía cuali. ⁴ Pampa inijuanti quimatiq quichihuaj miyac tamanti, quicualchijchihuaj sese cuarto ipan ininchajchaj, huan quintemitía ica miyac tamanti yejyectzitzi huan cati patiyo.

⁵ Se tacat cati talnamiqui quitanis se cati quipiya tetili. Achi más ipati talnamiquilisti huan amo

fuerza. ⁶ Se cati talnamiqui huelis tatanis ipan tatehuilisti pampa quintajtanía talnamiquini miyac consejo.

⁷ Pero se tacat cati huihuitic amo hueli quipantía talnamiquilisti, yon amo quimati taya quiijtos quema quihuicaj ipan tequicali para quitajtolsencahuase.

⁸ Se cati san moyolilhuía quenicatza quichihuas cati amo cuali, sequinoc quiitaj para eli se masehuali cati fiero italnamiquilis. ⁹ Nochi cati moilhuíaj para quichihuase cati huihuitique eltoc se tajtacoli. Huan sequinoc masehualme amo quinequij quinitase cati tehuihuiitaj pampa mohueyimati.

¹⁰ Sinta timotatzcanequis tonaya ipan motequi, noja más caxantiyas motetilis para tijtamiltis.

¹¹ Xiquinmanahui nopa masehualme cati quinhuicaj para quinmictise masque amo teno quichijtoque. Xiquinmaquixti cati quinhuilantiyahuij para quinmictise. ¹² Amo huelis timotechtis huan tiquijtos para amo tijmatiyaya yon teno. ¿Amo tijmati para TOTECO cati quiixmati iniyolo nochimasehualme quiixmati moyolo ta, huan yaya quimati para tijmatiyaya?

Huan yaya techtaxtahuis sese tojuanti quej quinamiqui ica cati tijchijtoque.

¹³ Notelpoca, xijcua sayolnecti pampa nelía cuali huan tijmatis para tzopelic. ¹⁴ Quej nopa nojquiya moalma quimatis para nopa talnamiquilisti eltoc nelcuali. Sinta tijpantis talnamiquilisti, nochim quisas cuali para ta. Huan nochim cati cuali timochiyayaya para tijpantis, quena tijpantis.

¹⁵ ¡Anmasehualme cati amo anquitepanitaj TOTECO! Ayecmo ximochiyaca icalteno se masehuali cati xitahuac para anquichihuilese cati fiero. Amo xiquichtequilica cati quipiya ipan ichaj. ¹⁶ ¿Amo anquimati para se cuali masehuali masque anquitaijyohuilitise chicome hueltas, nochipa sempa motananas? Pero quema san setzi taijyohuilsti amechajsis anamo cuajcualme, elis cuali para amechezontamiltis.

¹⁷ Amo xiyolpaqui quema mocualancaitaca huetzi ipan taohuijcayot. Amo xijhuetzquila quema yaya quipiya tequipacholi, ¹⁸ pampa TOTECO amo quipactis cati tijchihuas. Huelis cuananis ica ta huan ayecmo quitatzacuiltis ya.

¹⁹ Amo ximotequipacho pampa amo tiitztoc quej amo cuajcualme, yon amo xiquixtoca inintomi. ²⁰ Pampa amo teno cati cuali quipantise teipa. Ininemilis amo cuajcualme sehuis san quej se taahuili.

²¹ Notelpoca, xiquimacasi huan xijtepanita TOTECO huan nopa tanahuatijquet. Amo ximomanelo inihuaya masehualme cati amo tatepanitaj. ²² Sinta tiquintoquilía, timomacas cuenta para timotzontamiltijtoc inihuaya, pampa ¿ajquia quimati hasta canque TOTECO huan nopa tanahuatijquet quintaijyohuilitis?

Sequinoc talnamijca camanali ten talnamiquini
Pr. 24:23-34

²³ Nica eltoc talnamijca camanali cati quijtojque masehualme cati talnamiquij. Amo cuali para se tetajtolsencajquet techicoicnelis quema

tetajtolsencahua. ²⁴ Sinta quiilhuis cati taixpanotoc: “Amo tijpiya tajtacoli”, nochí masehualme quicualancaitase huan quitelchihuase. ²⁵ Pero se juez cati tetajtolsencahuas xitahuac huan quintatzacuiltis cati nelía taixpanotoque, quiselis tati-ochihualisti.

²⁶ Se masehuali quinextilía miyac tatepanitacayot nopa masehuali cati quinanquilía xitahuac quema quitatzintoquilía se tamanti.

²⁷ Achtohui xijtani nopa tomi cati monequi para ica timopanoltis, teipa ximocualtalili momil huan hasta teipa xijpehualti xijchijchihua mochaj.

²⁸ Amo ximochihua se testigo para tiquijtos cati amo melahuac ten mocalnechca cati xitahuac nemí. Amo xitacajcayahua huan xiistacati ten seyoc. ²⁹ Amo quema xiquijto: “Quej yaya nechchihuili, na nojquiya nijchihuilis. Nijcuepilis nochí cati fiero nechchihuilitoc.”

³⁰ Na nipanoc imila se masehuali cati tatzihui. Quena, nipanoc ipan ixocomeca mil se cati huihuitic. ³¹ Huan niquitac para tahuel cuatita eltoya ica huitzti huan xihuit. Huan ya huetztoya nopa tepamit cati ica quitzactoya yahualtic. ³² Huajca quema niquitac nochí ya nopa, nijtzontecontali huan nimoyolihui quej ni. ³³ Sinta se moiilhúa: “Noja se quentzi más nicochis huan nimosiyajquetzas. San se talojtzi más nimomanajnahuas huan amo titequitis.” ³⁴ Cati ya nopa quiijtohua ica se talojtzi mochihuas se teicneltzi. Nimantzi itaijyohuilis hualas ipani quej se tachtejquet huala ipan se talojtzi quema amo quichiya.

25

Nopa ompa amatajcuiloli ica italnamijca camanal Salomón Pr. 25:1—29:27

¹ Ya ni nojquiya eltoc italnamijca camanal Tanahuatijquet Salomón. Tacame cati quitequipanohuayayaj Ezequías, tanahuatijquet ipan tali Judá, quijjcuilojque ni camanali quema ya mictoya Salomón.

² TOTECO quinextía ihueyitilis ica noch tamanti cati ixtacatzi huan amo tihuelij tijmachilíaj. Pero nopa tanahuatiani quinextíaj inihueyitilis para momachtíaj huan quitemohuaj quimachilise noch cati huelij.

³ Amo aqui hueli quimachilía quesqui ihuejcapanca ilhuicacti, yon quesqui ihuejcatanca huelis se taxahuas ipan taltipacti. Nojquiya amo aqui hueli quimatis noch cati moilhuía se tanahuatijquet ipan italnamiquilis.

⁴ Quema se quipanoltía plata teposti ipan tit, quisa noch isoquiyo huan mocahua senquisa tapajpactic. Huajca quena, nopa teposchijquet hueli ica quichichihuas se tamanti cati tahuel patiyo. ⁵ Huan quej nopa nojquiya xiquinquistica noch nopa amo cuajcualme ipan icaltanahutil se tanahuatijquet, huan itanahuatilis elis temachti huan noch itequichijcahua tetajtolsencahuase xitahuac.

⁶ Amo xiquilhui se tanahuatijquet ma mitznextili tatepanitacayot, yon amo ximocalaqui campa huejhueyi tacame quej tielisquía san se inihuaya.

⁷ Más cuali para timochiyas huan huelis teipa yaya mitznotzas para ximosehuiti campa achi cuali.

Pampa sintā ticalaquis nechca nopa tanahuati-jquet, yaya mitzilhuis xiya tatzinta, huan quej nopa mitzpinahaultis miyacapa.

Masque ipa tiquitztoc cati quichihua,⁸ amo nimantzi xiya ipan tequicali para tijtelhuis mocualancaitaca, pampa amo tijmati canque mitzhuicas huan huelis teipa mitzpinahaultis pampa amo tijmatis taya tiquijtos.⁹ Achtohui xijchihua campeca timoxitahuas ica cati quichijtoc para san ta huan ya anquimatise. Amo aqui seyoc xijpohuili ten panotoc.¹⁰ Pampa seyoc cati mitzcaquis huelis mitztatelhuis quej se titeejelnamijquet, huan quej nopa nochimoilhuese ten ta para nochipa.

¹¹ Quema se mitzilhuis se camanali cati quinamiqui cati mitzpalehuis ipan nopa talojtzi, nelia miyac ipati. Eltoc quej se manzana ten oro cati eltoc ipan se chiquihuit cati quichijchijtoque ica plata.

¹² Se cati tacaqui quiselia icamanal se talnamijquet cati quitacahualtia quema monequi. Quena, quiita iconsejo quej elisquia se anillo o se costi ten senquisa oro.

¹³ Se tayolmelajquet cati temachti huan quijtohua nochia cati melahuac eli quej ya ajositoc tonali para taseseyas quema huejcajtoc para tahuel tato-toniya. Quena, quimacas iteco cati quititan-toc tasehuilisti ipan iyolo pampa quimati para temachti itatitanil tepohuilis senquisa nopa camanali cati quinequi.

¹⁴ Cati quitencahua temacas se tamanti huan amo temaca, eli quej nopa mixti huan ajacat cati amo quihualica at.

15 Xijpiya moyolo huan xicamanalti ica yamanic huan se tanahuatijquet mitzcaquilis mocamanal, huan tijyoltalis se cati tahuel cualantoc.

16 Sinta tijpantis sayolnecti, amo xijcua miyac masque tahuel ajhuiyac, pampa sinta pano miyac tijcuas, teipa tiquisotas.

17 Se cati mocalnechca, amo xijpaxalo neltalo-jtzitzti, pampa huelis tijcuesihuiltis huan teipa amo quinequis mitzitas.

18 Se cati quiistacahuía seyoc masehuali nelía quitaijyohuilitá. Quicocohua quej se martillo, o se cuchillo o se macheta cati tahuel tatequi.

19 Quema se acajya ipan taohuijcayot motemachía ipan se masehuali cati tacajcayahua, eli quej tacuasquía ica itancoch cati cualotoc o quej nejnemisquía ica se iicxi cocojtoc.

20 Sinta timonextis tiyolpactoc iixpa se cati tahuel moyoltequipachohua, elis quej tiquichte-quilisquía iyoyo quema taseseya, o quej tijtalil-isquía vinagre o istat campa icocohua.

21 Sinta se mocualancaitaca mayana, xijtamaca. Sinta amiqui, xicamaca. **22** Huan ya nopa quichi-hualtis ma moixpinahua, huan TOTECO mitztatuhuis ica cuali.

23 Temachti se ajacat cati huala ica norte qui-hualica at, huan nojquiya temachti se cati camanalti fiero quiyoliltía cualanti.

24 Más cuali para tiitztos moselti ipan se pilcaltzi cati sosoltic, huan amo ipan se hueyi cali cati yejyectzi ihuaya se sihuat cati sencualantoc.

25 Se cuali camanali cati ajsi ten moteixmatca cati huejca itztoc ipan seyoc tali, eli cuali quej

nopa at sesec cati quii se masehuali cati tahuel amiqui.

26 Sinta se cuali masehuali motemaca para quichihuas cati fiero inihuaya amo cuajcualme, eltoc quej se cati quisoquihuía o quitetetzohua se ameli.

27 Amo cuali para se quicuas miyac sayolnecti. Nojquiya amo cuali para se masehuali moilhuis ten nopa tatepanitacayot cati huelis quinamiqui para quiselis.

28 Se masehuali cati amo hueli motzacuilia para amo cualanis huan quichihuas cati amo quinamiqui, nelia mahuilili quej se altepet cati amo quipiya tepamit yahualtic para quimanahuis.

26

1 Amo quinamiqui para tasesecayot huetzis ipan nopa tonali quema tahuel tatotoniya, yon para huetzis at quema onca pixquisti. Nojquiya amo quinamiqui para se cati huihuitic quiselis tatepanitacayot.

2 Quej nopa totot soquipali cati mocuapoloj-toc huan quej nopa totome golondrinas cati san patantinemij, nojquiya se tatelchihualisti amo quiajsis se acajya sinta amo quipiya itajtacol.

3 Se masehuali huelis quinejnemiltis se cahuayo ica se cuetaxti imaco. Huelis quinejnemiltis se burro sinta quiquechilpis, huan huelis quinejnemiltis se cati huihuitic sinta quipiya se cuapipitzti imaco para icuitapa.

4 Quema timonajnanquilíaihuaya se cati huihuitic, amo xijnanquili nopa huihuiyot cati quiijtohua quej elisquíá camanali cati quinamiqui pampa ta tinesis tihihuitic nojquiya.

5 Pero quema timonajnanquilíaihuaya se cati huihuitic, xijcuepili para tijpanextis para nelía huihuitic nopa masehuali, para yaya amo mohueyimatis huanmoilhuis para yaya más talnamiqui.

6 Cati motemachía ipan se masehuali cati huihuitic para ma quihuica se camanali para quiyolmelahuas seyoc, amo quipiya talnamiquilisti. Yaya eli quej se cati moicxitzontequi o quiitzquía se tamanti pajyo cati temictía.

7 Se cati metzhuapactic, iicxihua san huiyontoque huan yon quentzi amo quipalehuía para nejnemis. Nojquiya ni talnamijca tamachtili yon quentzi amo quipalehuía se cati huihuitic.

8 Sinta tijtepanitas se cati huihuitic, huajca tijchihua se huihuiyot quej se huihui tacat cati quiilpía se tet ipan tatehuitatzti para amo cana yas.

9 Se ihuintquet amo quimachilía sinta cococ quema mochajcohua ica se huitzti, huan se cati huihuitic amo hueli quimachilía ni talnamijca consejos.

10 Sinta se teteco quiselis se tequipanojquet cati huihuitic o se cati moquetza ipan tianquis, nopa teteco amo quimati taya ipantis. Eltoc quej se soldado cati campa hueli tamota huan amo quimati ajquiya quicocos.

11 Quej se chichi mocuepa huan quicua sempa cati quiisotatoc, nojquiya se cati huihuitic sempa quichihua nopa huihuiyot cati sanoc quicajtoci.

12 Pero más amo ohui para tijmachtis se cati huihuitic ma eli talnamiqui, huan amo se cati mohueyimati.

13 Para amo yas tequititi se tacat cati tatzihui quiijtohua: “Huelis itztos se tecuani ipan ojti o ipan tianquis, huajca mahuilili para niquisas.”

14 Huan quej nopa caltemit cati momalaca-chohua ipan nopa teposti campa motatzquilijtoc, quej nopa se tacat cati tatzihui talojtzitzi mocuepa huan moteca ipan itapech.

15 Sequij masehualme itztoque nel tatzihuij hasta quiohuijmatij para tacuase.

16 Cati tatzihuij motepanitaj huan moitaj para nelía talnamiquij. Moilhuíaj para inintalnamiquilis quipano cati quipiyaj chicome talnamijca masehualme cati tahuel quimatij teconsejomacaj.

17 Se cati mocalaquía ipan se cualanti campa amo icuenta mocalaquía ipan se tamanti cati mahuilili. Huan eltoc san se ica se cati quitanana se chichi ipan inacas.

18 Quej se cati locohti quimajcahua ticuahuit lementoc huan cuataminti campa hueli huan amo quichihuila cuenta sintia temictis, **19** quej nopa nojquiya se cati quicajcayahua ihuampo huan teipa quiijtohua para san ahuilcamanaltiyaya.

20 Se tit sehuis quema amo quipiya cuahuit, huan nojquiya tamis cualanti campa amo aqui se cati teejelnamiqui.

21 Cati quipiya ticoli cati xahuantoc o cati quipiya tit nimantzi hueli quiticuiltis cuahuit,

huan se masehuali cati quipactía tanajnanquilía nimantzi quipehualtía cualanti.

22 Icamanal se cati ixłacatzí mitzilhuis se camanali para quiejelnamiquis seyoc, eltoc quej se tamanti ajhuiyac ipan mocamac, pero para cati quitaijilhuía, calaqui hasta más iyolijtic para quicocos.

23 Se soqui chachapali cati quialtijtoque ica plata tecajcayahua quej se masehuali cati pano fiero iyolo pero quitatía ica camanali cati caquisti para cuali.

24 Se masehuali cati ipan iyolo tecualancaita quemantica quitatía icualancayo ica miyac camanali cati yejyectzi, pero amo xijneltoquili pampa san quichihua para mitzcajcayahuas.

25 Masque mitzcamanalhuis quej se cuali masehuali, amo xijneltoquili, pampa italnamiquilis tahuel temitoc ica nochí cati fiero. **26** Huan masque ipan nopa talojtzi amo mitznextilis cualanti para mitzcajcayahuas, teipa mopanextis icualancayo miyacapa huan nochí quiitase.

27 Sinta tijchihua se ostot quej se taquetzti para nopona ma huetzi mohuampo, nopona timotaquechilía. Huan sintia tijcuamimilos se hueyi tet para ma quitzonpechiti seyoc, mocuepati nopa tet huan mitztzonpechiqui ta.

28 Se cati quinistacahuía sequinoc quinextía para quincualancaita huan quincocohua. Huan se cati camanalti cuajcualtzi camanali para quiejyectalis seyoc huan quicajcayahuas, tahuel tasosolohua.

27

¹ Amo ximohueyimati ica cati timoilhuía para tijchihuas mosta, pampa amo tijmati taya panos ipan nopa seyoc tonali.

² Amo xicamanalti para timohueyimatis ica moselti, achi cuali xiquincahuili para sequinoc ma mitzhueyichihuaca.

³ Se tet nelía etic huan nojquiya etic xali, pero achi más etic quema se cati huihuitic tahuel mitzcualancaita.

⁴ Achi más mahuilili se cati quiixtoca cati sequinoc quipiyaj huan amo cati mosisinía huan tecualancaita.

⁵ Más cuali se cati mitztacahualtis chicahuac quema monequi, huan amo se cati mitzilhuis ix-tacatzí para mitzicnelía pero amo quema mitznextilia.

⁶ Achi más temachti tohuampo cati techcoco-hua quema monequi techajhuas, huan amo se tocualancaitaca cati techtzopónia san para tech-cajcyahuas.

⁷ Se cati ixhuitoc hasta sayolnecti amo quinequi quiitas, pero se cati mayancamictinemi quicua nochí cati quiajsi masque chichic.

⁸ Se totot cati patantehua huejca ten itepasol, eltoc quej se masehuali cati quicajtehua campa tacatqui para huejca yas.

⁹ Se aceite o se taajhuiyacayot cati ticajhuiyac-matij techyolpactía. Huan se cuali consejo cati se tohuampo techilhuía techmaca paquilisti hasta campa hueli topani.

¹⁰ Amo quema xiquintahuelcahua mohuam-poyohua, yon motata ihuampoyohua. Huan

quema tipiyas se cuesoli, amo xijtemoti moicni cati itztoc huejca, pampa más cuali se mohuampo cati itztoc nechca huan amo se moicni cati itztoc huejca.

¹¹ Xieli titalnamiqui, tinotelpoca, huan techmacas miyac paquilisti. Sinta tielis se talnamijquet, huelis niquinanquilis cati nechtaijilhuiáj.

¹² Se cati talnamiqui nimantzi momaca cuenta quema imelac huala cati mahuillili huan momanahuía. Pero cati huihuitque amo momacaj cuenta huan quinajsi cati quincocohua.

¹³ Xijcuali se tamanti cati iaxca nopa masehuali cati mocuiltía para mitztaxtahuis cati seyoc mitztahuiquilía cati yaya amo cuali quiixmati. Huan nojquiya xicajocuili miyac tamanti cati iaxca cati mocuiltía para mitztaxtahuis cati mitztahuiquilía se momecatijca sihuat.

¹⁴ Sinta nelijnaloc tijcuatzajtzilis mohuampo para tijtajpalos, yaya quitas para tijtelchihua.

¹⁵ Se sihuat cati taloitzitzi mosisinía huan sensualtoc, eli san se ica nopa at cati taloitzitzi chichipica huan mitzcuatotonía miyac quema tami huetzi at. ¹⁶ Cati mochihua quej quitilquetza icualancayo, eltoc quej quichihua campeca para quitzacuivilis nopa ajacat o quicuis aceite ipan ímax para quihiucas.

¹⁷ Monequi se tamanti teposti para quitentis seyoc teposti. Huan se masehuali cati talnamiqui quipalehuía ihuampo más mortalnamictis.

¹⁸ Cati quimocuitahuía itatochua, quicuas itajca. Nojquiya se tequipanojquet cati quimocuitahuía cati iaxca iteco quiselis tatepanitacayot.

19 Se masehuali hueli moita ipan at huan quiita quenicatza nesi ixayac. Nojquiya cati se masehuali quichihua ica nochí iyolo quinextilía sequinoc sinta yaya itztoc cuali o amo cuali.

20 Nochipa miquilisti quinequi quinpantis más masehualme para quincuilis ininemilis, huan micta amo quema temi ica mijcatzitz. Huan se masehuali cati quiita tamanti cati yancuic amo quema yolpaqui ica cati ya quipixtoc, noja quinequi más.

21 Monequi tit para quiyejyecose oro huan plata para quiitase sinta nelía cuali. Pero quiyejyecohuaj se masehuali quema sequinoc quihueyimatiij. Quej yaya quiselía inincamanal cati quiijtojtoque quinextía sinta cuali iyolo o amo.

22 Se cati huihuitic amo quicahuas ihuihuiyo, masque tijtaliskuía ipan se hueyi chilcaxit huan tahuel tijtejtzonas para tiquiniyocacahuas.

23 Mojmosta cuali xiquintachili quenicatza itztoque moborregojhua huan mohuacaxhua cati ica timoaxilijtoc. **24** Pampa masque tahuel titapijpiya, cati tijpiya amo huejcahuas para nochipa sinta amo tijmocuitahuis. Masque se mochijtoc tanahuatijquet amo mocahuas nopa tequiticayot para iconehua huan iixhuihua sinta amo quimocuitahuía cati pano ipan nopa caltanahutili ica miyac cuidado. **25** Quema tijtzontequis nopa sacat cati chicajtoc, huan chamanis nopa xihuit cati xoxohuic. huan teipa huelis tijpixcas nopa sequinoc xihuime ipan cuatita. **26** Maborregojhua mitzmacase inijhuiyo para tijtequihuis para timochijchihuilis moyoyo para

quema taseseya. Huelis tiquinnamacas mochivojhua huan ica timocohuis se mili. ²⁷ Ica inilechi mosihua chivojhua huelis timopanoltis inihuaya moteixmatcahua huan motequipanojcahua.

28

¹ Se masehuali cati amo quitepanita TOTECO cholohua masque amo aqui quiquixtía, pero se cati monejnemiltía xitahuac mosemaca quej se león.

² Quema tahuel tajtacolchihuaj imasehualhua se tali, momiyaquilíaj inintanahuatijcahua huan inintal huelis huetzis tatzinta. Pero quema tanahuatía se masehuali cati itztoc xitahuac huan talnamiqui, onca temachili ipan se tali.

³ Quema se tacat cati teicneltzi quintachtequilía cati más teicneltzitzi que ya, eltoc quej pano chicahuac huetzi at huan quitaminenpolohua nochí mili huan amo quicahua sinti para oncas taxcali.

⁴ Masehualme cati amo quitepanitaj tanahutili quinyolchicahuaj cati amo cuajcualme, pero cati quichihuaj cati quijtohua tanahuutili quincualancaitaj nopa amo cuajcualme.

⁵ Amo cuajcualme amo quimachilíaj quenicatza huelis mochihuas cati xitahuac ipan se tali, pero cati quitemohuaj TOTECO huan quichihuaj cati ipaquilis quimachilíaj nochí tamanti.

⁶ Más cuali tielis se teicneltzi cati monejnemiltía xitahuac, huan amo se tominpixquet cati fiero iojhui.

⁷ Se talnamijca telpocat quintepanita itanahuatilhua TOTECO, pero se telpocat cati nemí inihuaya cati amo tequitij huan nochí se tonal san tacua quipinahualtía itata.

⁸ Se catí quintanejtía itomi pilteicneltzitzí huan quininama itanca para más huelis moricojchihuas, quipolos iricojyo. Itomi ajsis imaco seyoc cati hueyi iyolo ica cati teicneltzitzí.

⁹ Sinta se masehuali amo quitepanita itanahuatilhua TOTECO, TOTECO amo quitacaquilis quemá motatajtía.

¹⁰ Se masehuali cati quihuica seyoc cati itztoc xitahuac ipan se ojti cati amo cuali, huetzis ipan nopa ostot cati quisencahuayaya para seyoc. Pero cati quinyolchicahua cuajcualme para más ma quichihuaca cati xitahuac, quiselis itaxtahuil.

¹¹ Se tominpixquet motepanita huan moilhuía para talnamiqui, pero se teicneltzi cati talnamiqui nimantzi quimati para amo cana.

¹² Quema cuajcualme tatanij, nochí masehualme yolpaquij. Pero quemá tatanij masehualme cati fiero inintalnamiquilis, nochí momajmatíaj huan motatíaj.

¹³ Cati quitatía itajtacolhua amo quisas cuali, pero cati quipohuilá TOTECO nochí itajtacolhua huan quicahua, TOTECO quitapojojpolhuis.

¹⁴ TOTECO quitiochihuas nopa masehuali cati yamanic iyolo huan quitepanita TOTECO, pero se masehuali cati yoltetic huan amo quichihuilá cuenta TOTECO huetzis ipan cati amo cuali.

¹⁵ Sinta se tanahuatijquet cati amo quitepanita TOTECO quipiya tequiticayot ica masehualme cati teicneltzitzí, nelía mahuilili. Yaya quintzajtziltis

quej se león cati mayana o se oso cati mosisinía huan nanalca pampa ayemo tacuajtoc.

16 Se tanahuatijquet cati huihuitic quintaijyohuiltía imasehualhua, pero se cati quintepanita imasehualhua huan amo quiixtoca quitanis tomi cati amo quinamiqui, huejcahuas inemilis para tanahuatis.

17 Se temictijquet cati quimachilía para amo cuali ten quichijqui quema temicti nochipa cholo-jtinemis ten nopa tajtacoli cati quihuica hasta nopa tonali quema miquis. Ma amo aqui quichihua campeca para quitzacuilis itacuajcualol.

18 Cati monejnemiltía xitahuac amo teno ipantis, pero cati quichihua cati amo xitahuac nimantzi huetzis.

19 Cati tequiti chicahuac ipan imila quipiyas itacualis hasta mocahuas, pero cati san moton-alpolohuaj ica tamanti cati amo teno ipati, elise teicneltzitzi.

20 Se masehuali cati itztoc temachti quiselis miyac tatiochihualisti, pero cati quinequi morico-jchihuas ica se talojtzi mohualiquilis taohuijcayot.

21 Amo cuali para se acajya quichicoicnelis se masehuali huan seyoc, amo. Monequi ma quinchihuili nochí masehualme quej quiijtohua tanahuatili. Pero sequij tajtacolchihuaj huan techicoicnelíaj por se taxtahuili cati san ipati quej se pantzi.

22 Se masehuali cati nochí tamanti quiixtoca quinequisquía moricojchihuas san ica se talojtzi. Pero amo quimati quej nopa más mochihuas teicneltzi.

23 Se cati quitacahaultía ihuampo quema mon-equi elis más inelhuampo teipa, que seyoc cati san quiyejyectalía ica icamanal pampa amo quinequi quilhuis cati xitahuac.

24 Cati quitachtequilía itata o inana huan quijj-tohua para ya nopa amo tajtacoli, eli san se ica se temictijquet.

25 Cati quiixtoca moaxcatis cati seyoc iaxca ni-mantzi quiyoliltía cualanti, pero cati motemachía ipan TOTECO quipiyas nochí cati cuali.

26 Cati motemachía ipan yaya iselti nelía huihuitic, pero cati motemachía ipan nopa talnamiquilisti cati TOTECO temaca, momanahuis ten taohuijcayot.

27 Cati quinpalehuía cati teicneltzitzí amo quema quípolos cati ica panos, pero cati moixtzacua huan moyoltetilía para amo quinpalehuis cati teicneltzí quipantis miyac tatelchihualisti.

28 Quema amo cuajcualme quiitzquíaj tequicayot para tanahuatise, masehualme motatíaj ica majmajti. Pero quema nopa amo cuali tequichihuani mopantíaj ica miquilisti, momiyaquilíaj masehualme cati itztoque xitahuaque.

29

1 Cati moyoltetilía huan amo quichihuilía cuenta quema sequinoc quitacahaultíaj, talochmiquis huan ayecmo oncas pajti para momanahuis.

2 Quema tanahuatíaj nopa masehualme cati xitahuaque, nochí masehualme yolpaquij, pero quema tanahuatíaj nopa masehualme cati

fiero inintalnamiquilis, nopa altepet ehuani taijyohuáj.

3 Se telpocat cati mojmosta quinequi elis más talnamiqui quipaquilismacas itata, pero cati nemí campa momecatijca sihuame quipinahualtía itata huan quipolos nochí cati quiselijtoc.

4 Se tanahuatijquet cati tetajtolsencahua xitahuac quichihua para nochí ipan ital ma eli temachti. Pero se tequitquet cati quiselis tomi ixtacatzi para quichihuas cati amo xitahuac quitzintahuetziltía ital.

5 Se cati quihueyimati seyoc ica miyac camanali cati yejyectzi para quicajcayahuas, eltoc quej quitalilía se taquetzti iojtipa para ma ipan huetzi.

6 Se tacat cati amo cuali moijilpía ipan itajtacolhua, pero cati nemí xitahuac, amo. Yaya huicatinemi huan nelía paqui.

7 Cuajcualme tamocuitahuáj para cati teicneltzitzí ma quipiyaca nochí caquihuili cati nopa tanahuatili quijitohua para quipiyaj, pero se masehuali cati amo quitepanita TOTECO amo quema mocuesohua por cati teicneltzitzí.

8 Cati tehuihuiitaj hueli quichihuaj cualanti ica nochí masehualme ipan se altepet, pero masehualme cati talnamiquij quichihuaj campeca para quisehuáj cualanti.

9 Quema se cati talnamiqui quihuica se cati huihuitic iixpa se juez, nopa huihui tacat san quihuihuiitas huan quihuetzquilis. Amo teno quisencahuas para moyoltalise.

10 Tacame cati temictíaj quincualancaitaj cati monejnemiltíaj xitahuac, pero cuajcualme quite-mohuaj cati elis cuali para nochí, masque amo cuajcualme.

11 Se cati huihuitic cuatzajtzi huan quinextía nochí icualancayo, pero se cati talnamiqui moiyyohuía huan moyoltalía.

12 Sinta se tanahuatijquet quinchihuilá cuenta masehualme cati istacatij, nochí itequipanojcahua mocuepase amo cuajcualme.

13 Se teicneltzi cati quitaijyohuiltíaj huan se cati tetaijyohuiltíaj nochí ome quipiyaj se tamanti cati san se. Itztoc yaya TOTECO cati quinmacatoc nochí ome nemilsti huan tachiyalisti.

14 Nopa tanahuatijquet cati quintajtolsencahua xitahuac cati teicneltzitzti quichihuas para itequiticayo ma huejcahuas para miyac xihuit.

15 Se conet cati quitacahualtíaj huan quihuitequij ica cuapipitzti quema quinamiqui, teipa elis talnamiqui. Pero se conet cati san quicahuilíaj ma quichihua cati quinequi, quinpinahaultis itatahua.

16 Quema quipiyaj tequiticayot miyac taixpanoca masehualme, momiyaquilá tajtacoli, pero masehualme cati monejnemiltíaj xitahuac mocahuase para quinitase quema tamis inintequiticayo.

17 Xijxitahua mocone huan huelis timosiyaj-quetzas huan amo timoyoltequipachos por ya. Quena, yaya quichihuas para nelía tiyolpaquis.

18 Ipan se tali campa amo aqui quiixmati TOTECO, yon amo aqui tematiltíia icamanal, nopa

masehualme quichihuaj miyac tamanti cati fiero. Pero ipan se tali campa masehualme quiixmatij huan quitepanitaj itanahuatilhua TOTÉCO, onca hueyi paquilsti.

¹⁹ Se tequipanojquet cati amo quitacaquilía san camanali, monequi tijtalnamictis huan tijtatza-cultis se quentzi. Masque quimachilía icamanal iteco, quemantica amo quichihuilía cuenta cati quinahuatía.

²⁰ ¿Tiquitztoc se masehuali cati camanalti miyac huan amo quichihuilía cuenta cati quiijtohua? Más cuali quisas se tacat cati huihuitic huan amo ya.

²¹ Sinta tahuel tiquicnelis se motequipanojca hasta quema noja se conetzi, teipa elis quej motelpoca cati quiselis cati tijcrajtehuas.

²² Se cati yolquentzi quipehualtía cualanti huan quichihua miyac tamanti tajtacoli.

²³ Se masehuali cati mohueyimati quipantis se acajya cati quiechcapantalís, pero cati moechcapanohuaj quipantise tatepanitacayot.

²⁴ Se masehuali cati quipalehuía se tachtejquet para tachtequis amo quipatiita inemilis. Quicaqui quema nopa juez quiilhuía para ma tatestigo-jquetza para quiijtos cati xitahuac huan amo quimati sintia quisas más cuali para quiijtos cati xitahuac o noja quitatis cati quichijqui.

²⁵ Cati más quinimacasij masehualme huan amo TOTÉCO mocalaquíaj ipan se taquetzti, pero cati motemachíaj ipan TOTÉCO itztose ica temachili.

²⁶ Miyac masehualme quitajtaníaj nopa tanahuatijquet ma quinchihuili se favor

para ma quinpalehui quema monequi quintajtolsencahuas, pero más cuali quitemose TOTECO pampa yaya nochipa tetajtolsencahua xitahuac.

²⁷ Masehualme cati monejnemiltíaj xitahuac amo quinequij quinitase amo cuajcualme. Huan amo cuajcualme nojquiya quincualancaitaj masehualme cati nemij ipan se ojti cati xitahuac.

30

Ya ni nopa talnamijca camanali ten Agur Pr. 30:1-33

¹ Ya ni nopa talnamijca camanali cati quiijto Agur icono Jaqué cati ejqui Masá. Agur quiijcuilo ya ni para Itiel huan Ucal: ² Tahuel más nihuihuitic que sequinoc masehualme. Amo nijmachilía tamanti cati onca quej sequinoc tamachilíaj. ³ Na amo nijpantijtoc talnamiquilisti cati eltoc ipan ni taltipacti, ¿quenicatza huelis niquixmatis TOTECO cati tatzejzeloltic?

⁴ San yaya TOTECO tejcotoc hasta ilhuicac huan sempa hualtemoc. San ya quitzacuila ajacat ica imax huan quiilpía hueyi at ipan ipayo. San yaya quichijchijqui taltipacti huan nochí cati onca. ¿Tijmati taya itoca huan taya itoca icone?

⁵ Nochi cati TOTECO quiijtojtoc para quichihuas, mochihuas pampa temachti nochí icamanal. Yaya quinmanahuía nochí cati motemachíaj ipan ya. ⁶ Amo xijpihuili cati yaya quiijtojtoc. Yaya huelis mitzacahualtis chicahuac huan tenextilis para tiistacatiquet. ⁷ NoTeco, nimitztajtanilía ome tamanti quema noja niitztoc. Se favor technanquili huan techchihuili cati

niquijtohua. ⁸ Achtohui techpalehui para amo nimohueyimatis, yon amo niistacatis. Nojquiya amo techricojtili, yon amo techpobrejchihua. San techmaca ten ica nipanotos mojmosta.

⁹ Pampa sintia nimoricojchihuas, huelis teipa nimohueyimatis huan nimoilhuis para amo monequi nimotemachis ipan ta TOTECO. Huan sintia nimochihuas tahuel niteicneltzi, huelis nitachtequis huan nimitzixpanos.

¹⁰ Amo quema xijtajilhui se tequipanojquet iixpa iteco, pampa huelis mitztelchihuas huan mitztaijyohuiltis.

¹¹ Itztoque sequij masehualme cati quintelchihuaj intintatahua. Amo quema quintascamatilíaj.

¹² Inijuanti moitaj para tahuel cuajcualme huan para quichihuaj nochí cati tapajpactic, pero nelía itztoque soquiyojque iixpa TOTECO huan miyac intintajtacolhua. ¹³ Nopa masehualme tahuel mohueyimatij huan motepanitaj hasta quinitaj sequinoc quej amo teno ininpati. ¹⁴ Masehualme quej nopa quihiucaj machetas quej imiyaca totan-cochhua para ica quintzontamiltise teicneltzitzi. Quena, nochí cati teicneltzitzi huan cati amo teno quipiyaj quinequij quinmictise.

¹⁵ Onca miyac tamanti quej nopa talcuitaxcoli cati quinequi tapijpiyas más mojmosta. Quena, nimitznextilis nahui tamanti cati amo quema tami ixhuij, huan amo quema quijtohuaj: “Ya cuali”. ¹⁶ Micta nochipa quinselía más mijcatzitzi. Se sihuat cati amo hueli coneipyá, nochipa quinequi se conet. Huactoc tali nochipa quinequi más at, huan tit nochipa quitemohua más tamanti para quitatis.

17 Cati quincualancaita o quinhuetzquilía itatahua, nopa tzojpilome huan cuatojme quiquixtilise iixteyolhua huan quincuase.

18 Huan onca nahui tamanti cati na amo hueli njimachilía, huan cati san nijtachilía:

19 se cuatojti cati patani ipan ajacat, se cohuat cati mohuahuatatzti ipan huejhueyi tet, nopa barco cati yahui aixco ipan hueyi at cati huejcata,

huan quenicatza se tacat mojmosta más quiicnelía nopa ichpocat cati quiixtoca.

20 Nojquiya amo hueli njimachilía quenicatza se sihuat hueli quinamacá itacayo, huan teipa tacua huan motenpojpojohua, huan quijjtohua: “Amo teno cati amo cuali nijchijtoc.”

21 Huan itztoque nahui tamanti cati quichihuaj ma momajmatica masehualme, huan cati inijuanti quichihuaj amo hueli quijyohuíaj:

22 se tequipanojquet cati mochihua se tanahuatijquet,

se masehuali huihuitic cati quipiya nochí cati quinequi hasta mocahua cati iaxca huan nelmohueyimati,

23 se sihuat cati nochí quicualancaitaj huan teipa monamictía,

huan se sihua tequipanojquet cati quicuilía ihuehue nopa sihuat cati quitequipanohuayaya.

24 Itztoque nahui piltapiyaltzitzti ipan taltipacti cati pisiltzitzti, pero tahuel talnamiquij hasta quinpanoj talnamiquini ica inintalnamijcayo.

25 Talnamiquij tzitzime pampa masque amo quipiyaj miyac chicahualisti,

quisentilíaj inintacualis quema tatotoniya.

- ²⁶ Talnamiquij cuatochime cati itztoque campa tet, pampa masque amo quipiyaj tetili, quichihuaj inintepasol campa tetzala.
- ²⁷ Talnamiquij pilchapoltzitzi pampa masque amo quipiyaj inintayacanca, nejnemij noch ica se pamit campa yahuij.
- ²⁸ Talnamiquij nopa tocame pampa masque amo ohui para tiquitzquis ica momax, itztoque campa hueli hasta ipan itequical se tanahuatijquet.
- ²⁹ Itztoque nahui tamanti cati nelía mosemacaj huan monemiltíaj quej se hueyi tanahuatijquet:
- ³⁰ se león cati más tetic que sequinoc tapiyalme, yaya amo cholohua pampa amo teno quimajmatía;
- ³¹ se cuapele cati tomahuac imetz, se oquich chivo, huan se hueyi tanahuatijquet quema quinyacana isoldados.
- ³² Sinta ica mohuihuiyo timohueyimajtoc huan timoyolhilhuijtoc para tijchihuas cati amo cuali, xipinahua ica cati timoilhuijtoc huan xijtali momax ipan mocamac, amo xijchihua yon se tamanti cati amo cuali.
- ³³ Sinta tijmanelos chicahuac nopa lechi, temachti tijchihuas mantequilla. Huan sinta tijtepachos chicahuac se masehuali iyacatzol, temachti quisas esti. Huan sinta tijcualancamacas seyoc, temachti anmotehuise.

31

Talnamijca camanali para Lemuel Pr. 31:1-9

¹ Ya ni nopa talnamijca camanali cati inana Tanahuatijsquet Lemuel ipan Masá quimachti huan cati yaya quiijcuilo.

² Ta, tinotelpoca, cati tiquisqui ipan notacayo. Ta cati nijmactili TOTECO, xijtacaquili noconsejo.

³ Amo xiquinmaca sihuame mochicahualis. Amo xinemí ipan nopa ojti campa miyac tanahuatiani mocuapolojtoque.

⁴ Lemuel, amo cuali para tanahuatiani huan tayacanani quiise xocomecat iayo, o sequinoc tamanti taili cati cococ. ⁵ Pampa sintia taise, quielcahuase cati quiijtohua tanahuatili, huan quemá quintajtolsencahuase cati teicneltzitzi huan cati taijyohuiáj miyac, huelis quichihuase cati amo xitahuac huan quinixpanose. ⁶ Xijcahua nopa taili para ma quiica cati taijyohuiáj huan ya miquisnequij, huan para sequinoc cati taijyohuiáj ipan iniyolo ica miyac cuesoli. ⁷ Inijuanti hueli quiise huan quielcahuase para nelía teicneltzitzi, huan ayecmo quielnamiquise inintaijyohuilis.

⁸ Pero ta xiquintenpalehui cati amo hueli camanaltij cuali para momanahuise. Xijmocuitahui para tequichihuani quintajtolsencahuase xitahuac nopa masehualme cati teicneltzitzi.

⁹ Quena, xiquintenpalehui cati teicneltzitzi huan cati taijyohuiáj. Xiquintajtolsencahua xitahuac quej quinamiqui.

Se sihuat cati nelía cuali Pr. 31:10-31

¹⁰ Tahuel ohui para tijpantis se sihuat cati cuali iyolo huan neltañamiqui. Se sihuat quej nopa achi más ipati huan amo quej nopa piltetzitzi cati más pajpatiyo. ¹¹ Ihuehue hueli motemachía ipan

ya ica nochí iyolo. Huan nopa sihuat quichihuas para ihuehue ma quipiya se nemilisti cati nelcuali. ¹² Mojmosta quichihuilis ihuehue cati cuali huan quipalehuis.

¹³ Quitemos yoyomit ten lino huan ten borrejome inijjhuiyo, huan tequitis chicahuac para quijitzomas cati moquentis ifamilia. ¹⁴ Yaya itztoc quej se barco ipan hueyi at. Amo majmahui para yas huejca para quitemos nopa tacualisti cati más cuali para cati itztoque ipan ichaj. ¹⁵ Se sihuat cati cuali, mijquehua quema ayemo tanesi para quisencahuas tacualisti para ifamilia, huan para quinilhuis itequipanojcahua taya tequit ma quichihuaca. ¹⁶ Nopa sihuat quitachiliti se tali huan quicohuas. Nopona quitocas se xocomeca mili ica cati quitantoc.

¹⁷ Nopa sihuat quipiya imetz huan imax cati tetic, huan quinelpactía tequitis. ¹⁸ Quimocuitahuía nopa tomi cati imaco eltoc para quitequihuis cuali huan ica talnamiquilisti. Yaya tequiti hasta tahuel tayohua. ¹⁹ Quimalina borrego ichcat huan quichihua hilera.

²⁰ Nochipa quinpalehuía cati teicneltzitzi ica cati quichijtoc ica imax huan quintemohua cati taiyohuiáj para quinpalehuis.

²¹ Amo motequipachohua masque tasehuetzi pampa quinchihuilijtoc nochí ifamilia iniyoyo cati tilahuac huan totonic. ²² Yaya quichijchihua taquemit cati yejyectzi para itapech. Moyoyontía ica iyoyo ten moradojtic huan lino cati más patiyo cati yaya mochijchihuilijtoc.

23 Nochi masehualme quiixmatij ihuehue pampa quitalijtoque se tequitiquet ipan tequicali ica ne sequinoc tayacanani. Campa hueli nochi quitepanitaj.

24 Nopa cuali sihuat quichijchihua yoyomit huan tzinquechilpicayot cati más cuali, huan quinemaquiltía tanamacani.

25 Nochi quimatij para nopa sihuat quipiya miyac chicahualisti huan nochi quitepanitaj. Yaya amo momajmatía para elis nanatzi. **26** Se cuali sihuat camanalti ica miyac talnamiquilisti, huan tamachtía ica miyac taicnelijcayot. **27** Ica miyac cuidado quitachilía sesen piltamantzitzi cati quimonequilía ifamilia. Amo quema tatzihui.

28 Iconehua huan ihuehue quitascamatilíaj. Injuanti camanaltij cuali ten ya huan quiilhuíaj: **29** “Miyac sihuame ipan ni taltipacti quichihuaj cati cuali huan quipiyaj miyac yajatili, pero ta tiquinpano nochi sequinoc.”

30 Quena, iyejyejca se sihuat amo huejahuas huan icualnesca huelis mitzcajcajahuas, pero se sihuat cati quitepanita TOTECO, nochi masehualme quihueyichihuase ipan nochi inemilis.

31 Ma quiseli tatepanitacayot nopa cuali sihuat por nochi cati cuali cati quichihua. Huan ma quitascamatilica nochi cati quihuicaj tequiticayot ipan ialtepe por itequi cati nelcuali.

**Icamanal toteco; Santa Biblia
Bible without Deuterocanon in Nahuatl, Huasteca
Central (MX:nch:Nahuatl, Huasteca Central)**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c565d9f9-d202-544b-b78a-3c93df26508e